



déi an där zoustänneger Verfassungsrevisionskommissionen och zréckbehale goufen.

Mir haten als ADR schonn eng zweet punktuell Revisioun vun der Verfassung fir dës Legislaturperiod proposéiert. Ech wëll déi just kuerz rappléieren: Dat ass eng Proposition vu mengem Kolleg Roy Reding iwwert den Déiereschutz, betreffend den Artikel 11bis vun der Constitution.

Déi Proposition de loi fir eng punktuell Revisioun vun der Constitution, fir d'Lëtzebuurger Sprooch als Sprooch vum Land ze deklaréieren, betrëfft den Artikel 29 vun eiser Constitution. Deen Text, wéi gesot, ass genau deen, dee bis elo och an der Diskussioun war: «La langue du Luxembourg est le luxembourgeois. La loi règle l'emploi des langues luxembourgeoise, française et allemande.» Et ass eis Hoffnung, Här President, Dir Dammen an Dir Hären, datt mer déi zwou Verfassungsrevisiounen, déi d'ADR punktuell proposéiert, nach virum Ofschloss vun dëser Legislaturperiod hei kënnen an der Chamber diskutéieren an decidéieren.

Här President, ech dierf lech deen Text iwwerreechen.

**7069** - Proposition de révision de l'article 29 de la Constitution

► **M. Mars Di Bartolomeo**, *Président*.- Merci.

## 11. Dépôt d'une motion par M. Fernand Kartheiser

► **M. Fernand Kartheiser** (ADR).- Am selwechte Geescht wëlle mer lech haut eng Motioun proposéieren, déi op dat ageet, wat ville Leit ganz besonnesch um Härz läit, an déi de Wëlle vun eiser politescher Gesellschaft hei a Form vun der Chamber wëllt kloer ënnermaueren: datt mer eis zesummen engagéiere fir d'Lëtzebuurger Sprooch an alle Beräicher.

Mir hunn an deene leschten Deeg héiere vu verschiddene Vertrieeder vu verschiddene Parteien, wéi wichteg hinnen d'Sprooch ass. Si soen alleguer, déi, déi mer héieren hunn, datt se sech wëllen engagéiere fir eis Sprooch, datt vill méi muss gemaach gi fir eis Sprooch, ouni awer de Multilinguismus a Fro ze stellen. Och dat ass eise Gedanken a mir deklinéieren deen op ganz verschide Manéieren:

Mir soen, datt mer wëlle Lëtzebuergesch als Nationalsprooch an als administrativ Sprooch ausbauen. Mir wëllen, datt déi Sprooch progressiv ëmmer méi kann als vollwäerteg Sprooch an der Legislatioun an op de Gerichter verwannt ginn an datt déi Uerteeler a verschide Gesetzestexter musse kënnen op Lëtzebuergesch iwwersat ginn, weinstens déi Texter, mat deenen d'Leit am meeschte konfrontéiert sinn.

D'Ministèren an d'Administrationen sollten en Effort maachen, hir Kommunikatiounen, Formulieren an aner offiziell Dokumenter un éischter Plaz op Lëtzebuergesch de Leit virzeleeën.

Mir proposéieren, datt am Nationalitéitgesetz drop verzicht gëtt, datt den Niveau vun de Sproochkenntnisser erofgesat gëtt, an datt drop verzicht gëtt, fir Leit, déi 20 Joer am Land wunnen an no där Zäit nach ëmmer kee Lëtzebuergesch kënnen, fir deenen och d'Nationalitéit ze ginn.

Mir hätte gär, a mir komme muer de Mëtten an enger Fro un d'Regierung dorobher zréck, datt d'Lëtzebuurger Sprooch eng Amtssprooch am Sënn vun den Décisiounen vum Conseil vun der Europäescher Unioun vum 13. Juni 2005 ass. An an deem Sënn soll d'Regierung och dat bei der Europäescher Unioun ufroen.

Mir wëllen d'Lëtzebuurger Sprooch an de Schoule souwuel als Unterrechtsfach, als Unterrechtssprooch, als Schoulsprooch an als Émgangssprooch festschreiwen. Mir wëlle Lëtzebuergesch an der Europaschoul, an de Privatschoulen an an deenen auslännesche Schoulen zu Lëtzebuerg ënnerstëtzen.

Mir wëllen an de Crëchen an am éischten Zyklus vum Fundamental op eng multilingual Fréierzéiung verzichten a Lëtzebuergesch als eenzeg Integratiounssprooch promovéieren.

D'Offer vu Sproochecoursen a Coursen iwwert d'Lëtzebuurger Kultur soll ausgebaut ginn an eisen auslännesche Matbiere solle reell Méiglechkeete gebuede ginn, fir och kënnen un deene Coursen deelzehuelen.

Am Gesondheets- an am Flegesecteur wëlle mer, datt d'Regierung eis kuerzfristeg Propositionen mécht, wéi kann effikass garantéiert ginn, datt déi Leit, déi mat Patienten a Kontakt

stinn, och d'Lëtzebuurger Sprooch op héijem Niveau schwätzen.

A mir wënschen eis vun der Regierung, datt se eis konkret Propositionen mécht, wéi Lëtzebuergesch an der Geschäftswelt ka promovéiert ginn, fir datt d'Leit, déi hei an e Geschäft ginn, och kënnen op Lëtzebuergesch hir Wënsch virbréngen.

### Motion

D'Chamber,

vu

- datt d'Lëtzebuurger Sprooch op groussen *Interessi stéisst an datt besonnesch am Kontext vun engem séieren demografesche Wandel de Wonsch grouss ass, Lëtzebuergesch méi ze flegen an ze promovéieren;*

- datt vill *Bierger, och Vertrieeder vu ville politesche Parteien, an der Éffentlechkeet an an de Medie fir eng Revalorisation vun der Lëtzebuurger Sprooch plädéieren;*

- datt d'Promotioun vun der Lëtzebuurger Sprooch de Multilinguismus net a Fro stellt;

- datt d'Lëtzebuurger Sprooch déi *gemeinsam Sprooch vun allen Awunner vum Land soll sinn an dowéinst als Integratiounssprooch muss weider ausgebaut ginn;*

fuerdert d'Regierung op:

- de Gebrauch vun der Lëtzebuurger Sprooch als Nationalsprooch an als administrativ Sprooch systematesch auszubauen an ze favoriséieren;

- alles ze maachen, fir datt Lëtzebuergesch *progressiv ëmmer méi kann als vollwäerteg Sprooch och an der Legislatioun an am Rechtswiese gebraucht ginn, an an enger éischter Phas rechtlech net verbindlech Iwwersetzung vum Uerteeler a verschiddene Gesetzestexter maachen ze loosser;*

- d'Publikatiounen, Matdeelungen a *Formulaire vun alle Ministèren a staatlechen Administrationen fir d'Éischt op Lëtzebuergesch erauszeginn;*

- d'Lëtzebuurger Sprooch als *éischt op den Internetsäite vu Gemengen a Stat an och op Stroosseschëlter a Panneae privilegiert ze gebrauchen;*

- den Niveau vum Sproochentest fir d'Lëtzebuurger *Nationalitéit net am Verglach zu haut erofsetzen an drop ze verzichten, Leit, déi schonn zwanzeg Joer am Land liewen, ouni Lëtzebuergesch geléiert ze hunn, d'Nationalitéit ze ginn;*

- d'Lëtzebuurger Sprooch an der EU als *Amtsprooch am Sënn vun der Décisioun vum Ministerrat vun der Europäescher Unioun vum 13. Juni 2005 unerkennen ze loosser;*

- d'Lëtzebuurger Sprooch an de *Schoulen zu Lëtzebuerg verstärkt ze ënnerriichten an och als Schoulsprooch, Émgangssprooch an de Schoulen an als Unterrechtssprooch festzeleeën;*

- Lëtzebuergesch och an der *Europaschoul, an de Privatschoulen an an deenen auslännesche Schoulen zu Lëtzebuerg ze ënnerstëtzen;*

- an den *ëffentleche Crëchen, am Précoce an an der Spillschoul (am „1. Zyklus“ vun der Grondschoul) op eng multilingual Fréierzéiung ze verzichten an d'Lëtzebuergesch als eenzeg Integratiounssprooch ze promovéieren;*

- d'Offer vun de *Sproochecoursen a vun de Coursen iwwer Lëtzebuurger Kultur konsequent an nohalteg weider auszubauen, och fir d'Integratioun vun den auslänneschen Awunner an anere Leit, déi un eiser Sprooch interesséiert sinn, ze begëschtegen;*

- bei den *auslännesche Matbiereger Reklamm ze maachen, fir datt si Lëtzebuergesch solle léieren, an hinnen dozou och konkret Méiglechkeete bidden;*

- bannent dräi *Méint e Plang virzeleeën, mat deem effikass a kuerzfristeg garantéiert ka ginn, datt am Gesondheets- an am Flegesecteur jidderen, deen am Kontakt mat Patiente steet, Lëtzebuergesch op engem héijen Niveau schwätzt;*

- bannent dräi *Méint d'Chamber ze informéieren, wéi eng Moossnamen d'Regierung wëllt huelen, fir déi Lëtzebuergesch Sprooch an der Geschäftswelt ze promovéieren;*

- der Chamber all sechs *Méint e Rapport ze presentéieren, an deem d'Efforte vun der Regierung fir déi Lëtzebuurger Sprooch detailléiert opgezielt an erkläert ginn an an deem weider Initiative proposéiert ginn.*

(s.) Fernand Kartheiser.

Alles dat steet an dëser Motioun. Mir hoffen, datt dee groussen Engagement, deen an de leschten Deeg hei deklaréiert ginn ass vun esou ville politesche Säiten, sech och an engem positive Vott iwwert dës Motioun nidderschleift an domadder der Gläwiedegkeet vun deenen, déi deen Engagement fir d'Lëtzebuurger Sprooch professéiert hunn, och zeguttkënn.

Ech soen lech Merci.

► **Une voix**.- Très bien!

► **M. Mars Di Bartolomeo**, *Président*.- Merci. Mir géifen dann zum eigentlechen Ordre du jour vun de Mëtten iwwergoen. Als éischte Punkt um Ordre du jour hu mer de Projet de loi 6935 iwwert de Congé parental. D'Riedezäit ass nom Modell 1 festgeluecht. An den honorabelen Här Rapporteur, den Här Gilles Baum, ass scho prett. Här Baum, Dir hutt d'Wuert.

## 12. 6935 - Projet de loi portant réforme du congé parental et modifiant

### 1. le Code du travail;

### 2. le Code de la sécurité sociale;

### 3. la loi modifiée du 4 décembre 1967 concernant l'impôt sur le revenu;

### 4. la loi modifiée du 16 avril 1979 fixant le statut général des fonctionnaires de l'État;

### 5. la loi modifiée du 24 décembre 1985 fixant le statut général des fonctionnaires communaux;

### 6. la loi modifiée du 14 mars 1988 portant création de congés d'accueil pour les salariés du secteur privé;

### 7. la loi modifiée du 12 février 1999 portant création d'un congé parental et d'un congé pour raisons familiales;

### 8. la loi modifiée du 31 juillet 2006 portant introduction d'un Code du travail

### Rapport de la Commission de la Famille et de l'Intégration

► **M. Gilles Baum** (DP), *rapporteur*.- Villmools Merci, Här President. Kolleeinnen a Kolleeen, wann een nach net esou laang an der Chamber hei vertrueden ass wéi verschiddener vun lech, dann ass et ëmmer nach e bësse speziell, hei uewen ze stoen. Wann een dann awer d'Chance huet, e Projet dierfe virstellen, op deen esou vill Leit dobausse waarden, e Projet, deen deene jonke Familien entgéintkënn, e Projet, deen et erlaabt, d'Familljeliewen an d'Aarbecht besser ënner een Hutt ze kréien, da kann ee sech glécklech schätzen. An d'Reform vum Congé parental ass esou e Projet. De Congé parental ass sonner Zweifel eng Erfolgsgeschicht. An de Mëtte schreiwe mer zesummen e weidert Kapitel.

Wann d'Kanner bis an engem säi Liewen anrieden, do ännert sech esou munches, an ech mengen, déi heibannen, déi Kanner hunn, wärte mer recht ginn. Besonnesch seng Zäit muss ee sech besser andeelen. Et muss ee besser plangen, fir grad wann d'Kanner kleng sinn Zäit ze hunn, eng fest Bindung mam Puppelchen oder mam Kand opzebauen, besonnesch an deenen éischte Joren. An ech soen lech et, et ass wichteg an et ass och ganz flott, vill Zäit ze hunn, fir mat senger Kanner ze verbréngen, fir mat senger Kanner kënnen ze spielen, ze gesinn, wéi si d'Welt entdecken, wéi si sech kierperlech entwéckelen, wéi si hir Sprooch entwéckelen. An et ass och immens wichteg, dass mer eis Kanner bei all deene Schrëtt ënnerstëtzen.

De Congé parental ass eng Méiglechkeet, déi dem Papp an der Mamm et erlaabt, méiglechst vill Zäit mam Kand ze verbréngen, ouni mussen ze fäerten, Nodeeler an der Aarbechtswelt ze hunn. An ech soen et hei an aller Däitlechkeet: De Congé parental ass e Recht. De Congé parental ass e Recht fir all Papp a fir all Mamm, egal wien dovunner deen éischte Congé parental hëlt a wien den zweeten hëlt.

De Congé parental fousst op enger Initiativ vun der Europäescher Unioun an en huet sech am Laf vun der Zäit weiderentwéckelt, besonnesch wat déi juristesche Sécherheeten ugeet. Zu Lëtzebuerg gouf en 1999 an d'Gesetzgebung iwwerholl an ëmgësat am Kader vun der Direktiv 96/34 vum Conseil vum 3. Juni 1996.

Déi Kolleeen, déi scho méi laang hei an der Chamber vertruede sinn, déi wärte sech dorunner bestëmmt erënneren. Deemools ass eist Gesetz scho méi wäit gaange wéi déi Direktiv, well d'Direktiv huet virgesinn, dass ee mindestens dräi Méint kéint sech ëm säi Kand bekëmmern. An déi zwee Modeller, déi hei zu Lëtzebuerg agefouert gi sinn, ech mengen déi kennt Der alleguer, dat heescht: sechs Méint direkt beim Kand bleiwen, sechs Méint Congé parental direkt, fir beim Kand ze bleiwen, oder zwielef Méint hallef.

Och war de Congé parental zu Lëtzebuerg vun Ufank un indemniséiert, eppes wat d'Direktiv net verlaangt huet. An ech mengen och, dass déi Indemnisation, déi d'Eltere kritt hunn, och zum groussen Deel zum flotte Succès vum Congé parental bäigedroen huet. War de Congé parental am éischte Moment als eng aarbechtspolitesch Moossnam an d'A gefaasst ginn, sou huet e sech awer ganz séier zu enger familjepolitescher Mesure entwéckelt.

Am Laf vun der Zäit goufe vereenzelt Ännerungen um Congé parental virgeholl, ouni awer déi zwee Modeller, déi ech lech elo genannt hunn, a Fro ze stellen. Esou gouf 2002 de Congé parental verduebelt fir eng Mamm, déi Zwillinge kritt, an 2006 gouf d'Indemnitéit op 1.778 Euro festgeluecht, respektiv 889 Euro fir e Congé parental zu 50%. An un deene Montanten huet sech vun 2006 bis haut näischt méi geännert.

Wéi vill Elteren awer vum Congé parental profitéiert hunn an all deene Joren, dat bewiese folgend Zuelen: Säit senger Aféierung am Joer 1999 bis den 31. Dezember 2014 hunn 80.863 Elteren de Congé parental an Usproch geholl. Dat ware 64.676 Mammen a 16.187 Pappen. A Prozenter ausgedréckt: 80% Mammen an 20% Pappen.

Bei de Mammen hu 24% de Congé parental hallef geholl a 76% Vollzäit. Bei de Pappen ass et e bësse méi équilibréiert: 42% Hallefzäit an 58% Vollzäit.

Am Joer 2015 konnt een awer feststellen, dass méi Elteren e Congé parental geholl hu wéi an der Moyenne vun deene Jore virdrun: genee 4.595 géint 4.256 am Joer virdrun, wat eng Steigerung vu ronn 8% ass.

Wee sech fir den Detail interesséiert, fënnt deesen an och nach ganz vill flott Informatiounen am Rapport d'activité vum Familljeministère.

Et war der Regierung wichteg, eng Bestandsopnam ze maachen, fir ze kucken, wat fir eng Aarbechtsmodeller den Elteren an awer och de Patrone géifen entgéintkommen. An et ass wichteg, hei ze ënnersträichen, dass dat Gesetz, wat mer elo hei virleien hunn, e Konsens ëmsetzt tëscht der Regierung an de Sozialpartner aus dem Abrëll 2015.

Donieft gouf vum Familljeministère e repräsentative Sondage mat 1.235 Leit an Optrag ginn, fir erauszefannen, ob d'Leit genuch informéiert sinn, wat de Congé parental ass, wat d'Grënn sinn, fir de Congé parental ze huelen oder net ze huelen, a wat d'Grënn sinn, fir en ze huelen oder en net ze huelen, wann Adaptatiounen um Congé parental géife virgeholl ginn.

Abee, ech kann lech soen: Dee Sondage huet gewisen, dass d'Leit dobausse ganz gutt wëssen, wat de Congé parental ass. Op alle Fall hu 85% vun de Leit dat ugin. An och 55% vun den Dammen, déi am Sondage matgemaach hunn, an 20% vun den Hären hunn uginn, den éischte Congé parental geholl ze hunn, de Congé parental beim éischte Kand.

Déi Haaptgrënn, fir de Congé parental net ze huelen, ware finanziell Grënn an e Manktum u Flexibilitéit bei den Aarbechtssäiten. Dës Reform ass wuel eng familjepolitesch Reform, mä si soll och de Patronen entgéintkommen, fir zesumme mam Papp oder der Mamm e flexibele Modell ze fannen, deen deenen zwee passt. De Patron kann zesumme mat den Elteren ënner méi Modeller wielen. E ka méi Modeller erausichen, déi och hien a sengem Betrib arrangéieren, well déi méi grouss Wiel stäerkt a mengen Aen d'Vertrauen tëschent dem Papp, der Mamm an hirem Patron, an ech denken, och d'Motioun op der Aarbecht.

Wat sinn dann elo déi Modeller, ënnert deenen d'Elteren an Zukunft sech dee kënnen erausichen, dee fir hir Situatioun am beschte passt? Als Éischt emol kann ee weiderhin de Congé parental huele sechs Méint ganz. Wann dat engem ze laang ass, kann een de Congé parental erofschrauwen op véier Méint ganz. Manner geet awer net, well mer duerch d'Contrainte vun der Direktiv gebonne sinn, mindestens véier Méint ze accordéieren.

Dës Modell géllt fir all Elteren, déi en Aarbechtskontrakt hu vu mindestens zéng Stonnen d'Woch. An dat ass eng wichteg Neierung, well virdru konnt een de Congé parental nëmmen huelen an et konnt een nëmmen an de Genoss vum Congé parental kommen, wann ee mindestens 20 Stonnen d'Woch geschafft huet. Mat deem ale System hu mer ganz vill Leit ausgeschloss.

Weiderhi kann ee mam Accord vum Patron och déi zwielef Méint hallef huelen. Och déi kënnen op aacht Méint reduzéiert ginn. Dës Modell géllt fir all Papp an all Mamm, déi en Aarbechtskontrakt vu mindestens 20 Stonnen d'Woch hunn.





Déi Pappen a Mammen, déi an engem Aarbechtskontrakt vu 40 Stonnen d'Woch sinn, kënnen ënner zwee weidere Modeller wien: entweder véiermol ee Mount an enger Period vun 20 Méint respektiv während 20 Méint een Dag (veuillez lire: an der Woch) doheem beim Puppelche bleiwen, dat heescht 80% schaffe während 20 Méint.

Wichtig ass och ervirzepräichen, dass den éischte Congé parental obligatoresch muss nom Congé de maternité oder dem Congé d'allaitement geholl ginn. Ass dat net de Fall, geet d'Recht op den éischte Congé parental verluer. Eng Ausnam gëllt hei awer fir allengerzéiend Mammen.

Dir wësst, dass d'Regierung och wëllt de Congé pour raisons familiales op de Leescht huelen, soudass an Zukunft all Mamm wäert dräi Méint no der Gebuert zegutt hunn, ob se hire Puppelchen niert oder net.

Wat si weider Neierungen, nieft den neie Modeller? D'Alterslimit vum Congé parental geet vu véier op fënnf Joer erop a se geet op zwielef Joer erop am Fall vun enger Adoptioun. Hei ass ze bemierken, dass am aktuelle Regimm de Congé parental schonn zur Halschent muss geholl ginn, éier d'Kand fënnf Joer huet. An Zukunft geet et duer, dass de Congé parental ufänkt virun deem Dag, wou d'Kand seng sechs Joer kritt.

Am Adoptiounsfall bei engem méi ale Kand, zum Beispill, gëtt eng Period vu sechs Méint (veuillez lire: sechs Joer) gerechent vum Enn vum Congé d'accueil respektiv vum Jugement bis zum Alter vu maximal zwielef Joer.

Fir konform mam europäesche Recht ze sinn, muss de Sëtz vun der Firma, bei där ee schafft, och net méi zu Lëtzebuerg sinn. Mä fir de Congé parental kënnen unzefroen, muss ee während deenen zwielef Méint virum Ufank vum Congé parental bei der Lëtzeburger Sécurité sociale affiliéiert gewiescht sinn. Och muss d'Kand net méi doheem bei deem Elterendeel wunne säit der Gebuert oder dem Accueil, well d'Garde alternée an d'Garde partagée ëmmer méi Famillje betreffen. Et geet duer, wann d'Kand déi meeschten Zäit bei deem ass, deen de Congé parental gefrot huet, ouni dass d'Kand wierklech muss op eng aner Adress ëmgemellt ginn.

Fir de Congé parental opzemaache fir Persounen, déi manner wéi 20 Stonnen d'Woch schaffen oder verschidden Aarbechtskontrakter cumuléieren, ass d'Minimumstonnenzuel op zéng Stonnen d'Woch erofgesat ginn. Doderuech gëtt de Pool vun de Leit, déi an de Genoss vum Congé parental kënnen kommen an trotzdeem de Lien mat hirer Aarbecht wëllen halen, wesentlech méi grouss.

Den neie Congé parental erlaabt et och Persounen, déi méi Aarbechtskontrakter hu bei verschiddene Patronen, zum Beispill Leit, déi stonneweis bei anere Leit doheem am Stot schaffen, de Congé parental kënnen ze huelen.

Wéi virdru beschriwwen, huet eng Persoun, déi manner wéi 20 Stonne schafft bei méi Patronen, elo och en Urecht op e Congé parental vu véier Méint ganz oder sechs Méint ganz. Schafft si bei méi Patronen, ass ëmmer den Accord vun de Patronen alleguete verlaangt.

Nach eemol am Kloertext: E Papp oder eng Mamm schafft 40 Stonne bei deemselwechte Patron, da kënnen si tëschent deene sechs Modeller wien. E Papp oder eng Mamm schafft 40 Stonnen d'Woch bei verschiddene Patronen, da kënnen se véier Méint ganz oder sechs Méint ganz huelen. E Papp oder eng Mamm schafft tëschent 20 a 40 Stonnen d'Woch bei engem Patron, da kënnen se véier oder sechs Méint ganz huele respektiv acht oder zwielef Méint hallef. Eng Mamm oder e Papp schafft tëschent 20 a 40 Stonnen d'Woch bei méi Patronen, da kënnen si véier oder sechs Méint fir sech huelen. Eng Mamm oder e Papp schafft manner wéi 20 Stonne bei engem oder méi Patronen, da kënnen se véier oder sechs Méint ganz huelen.

Ech wëll och notéieren, dass déi Leit mat engem Contrat d'apprentissage, dat heescht déi Leit, déi eng Léier maachen, och kënnen an de Genoss komme vum Congé parental, véier Méint oder sechs Méint ganz.

Eng Neierung ass och, dass en hallwe Congé parental bedeit, dass d'Aarbechtszäit ëm 50% gekierzt gëtt an net wéi bis elo 20 Stonnen d'Woch manner wéi festgehalten ass am Aarbechtskontrakt.

Déi nei Modeller vum fraktionéierte Congé parental gi vum Elterendeel an dem Patron an engem Plan de congé parental festgehalten an dann zesumme mat der Demande un d'Zukunftskeess geschéckt. Annerungen un deem Plang sinn nëmme méiglech, wat d'Méint oder den Horaire ugeet. De Modell vum Congé parental kann awer net méi géinnert ginn, wann e bis eemol accordéiert ass.

Wann et keen Accord gëtt tëschent dem Patron an dem Elterendeel, wat de Modell ugeet, da proposéiert de Patron e Gespréich an en alternative Plan de congé parental an engem Délai vun zwou Wochen. Wann och dee Congé parental refuséiert gëtt, da behalen de Papp oder d'Mamm d'Recht op véier oder sechs Méint ganz.

Deen Elterendeel, deen den éischte Congé parental wëllt huelen, muss sengem Patron Bescheid soe per Post, also als Recommandé, an dat spéitstens zwee Méint, éier de Congé de maternité ufänkt.

Den zweete Congé parental ka geholl gi vun deem Elterendeel, deen den éischte Congé parental net hat. Well et en Individualrecht ass, kann een deen och net weiderginn. Wat allerdéngs nei ass, dat ass, dass déi zwee Elterendeeler kënnen gläichzäitig de Congé parental huelen. Wéi beim éischte Congé parental muss de Patron och hei véier oder sechs Méint ganz accordéieren. Fir déi aner Modeller muss een e Plan de congé parental mat sengem Patron ausschaffen.

Beim zweete Congé parental dierf de Patron aus gewëssene Grënn, déi am Aarbechtsrecht virgesi sinn, den Ufank vum Congé parental op e spéideren Datum verleeën, wann zum Beispill e groussen Deel vu sengem Personal de Congé parental géif wëllen zur selwechter Zäit huelen an den normalen Aarbechtsloaf net méi geséichert wier.

Während dem ganze Congé parental ass de Papp oder d'Mamm géint eng Entloossung ofgeséichert, an dat vum leschten Dag un, wou een de Congé parental kann ufroen, bis zum Enn vum Congé parental.

Mir hu beim zweete Congé parental och Wäert drop geluecht, dass dat Recht, e Congé parental zesumme ze huelen, net nëmme en theoretescht Recht bleift. An d'ofir ass den Délai, wou den Elterendeel de Congé parental beim Patron muss ufroen, vun haut sechs Méint op zukünfteg véier Méint gekierzt ginn. Esou ass et dem Papp zum Beispill méiglech gemaach ginn, den zweete Congé parental och reell kënnen unzetrieden, wann d'Mamm de Congé consécutif hält.

Den zweete wichtigen Aspekt niewent enger méi grousser Flexibilität ass d'Héicht vum Ersatzgeld, dat d'Elteren, déi sech derfir entschueden, de Congé parental ze huelen, och kréien. Den aktuelle Montant vun 1.778 Euro ass fir vill Leit ganz kloer eng Brems. An de Sondage huet et ganz kloer gewisen: Wat de Revenu méi héich, ergo den Ausfall méi héich ass, wat d'Leit och méi zécken, fir vum Congé parental ze profitéieren. Dat beweist och de Congé non indemnisé vu véier Méint, deen een am ale Gesetz konnt huelen: Bei der Zukunftskeess si keng Handvoll esou Demanden eragaangen, an dat säit 1999.

Fir deem entgéintzewierken, gëtt e regelrecht Ersatzgehalt, e Revenu de remplacement, agefouert. Dëst Gehalt gëtt au prorata vun deem ausbezuelte, wat vun der Pai verluer geet, an dat mat engem maximale Plaffong vun 3.204 Euro brutto. Domat komme mir och dem Avis vum Statsrot aus dem Joer 2004 no. An duerch den neie System behalen d'Elteren och weiderhin ouni Ennerbriechung hir Assurance pension. Och ass duerch d'Aféierung vun engem Ersatzloun eng automatesch Upassung un den Index ofgeséichert, wat bei der aktueller Indemnitéit säit 2006 net méi de Fall war.

Duerch d'Méiglechkeet, am fraktionéierte Modell 20% doheem ze bleiwen, gëtt de Lounausfall natierlech wesentlech méi kleng, wéi wann e 50% oder 100% wär. Well d'Suen, déi an engem Stot sinn, eropginn, an hoffentlech och méi Papp vum Congé parental Gebrauch wäerte maachen, gëtt sech erwaart, dass et fir d'Frae méi einfach gëtt, fir doheem ze bleiwen oder fir zrëck an d'Aarbecht ze goen, well de Budget vum Stot bal identesch bleift.

De Revenu de remplacement gëtt gerechent um Revenu cotisable vun deene leschten zwielef Méint virum Ufank vum Congé parental. De Centre commun de la sécurité sociale iwwerliewert déi Zuelen dann un d'Zukunftskeess, déi zoustänneg ass, fir de Revenu de remplacement auszebezuelen. De Montant vum Revenu de remplacement huet als ënnescht Limit den onqualifizéierte Mindestloun vun 1.922 Euro an als ieweschst Limit 3.204 Euro brutto, wat dem soziale Mindestloun plus zwee Drëttel entsprécht. Dës Montante bezéie sech natierlech op Vollzäitaarbechtskontrakter vun 173 Stonnen d'Woch (veuillez lire: de Mount).

A Leit, déi sech derfir interesséieren, Leit, déi wëllen ausrechnen, wi vill si dann als Bruttorevenu de remplacement géife kréien an deene verschiddene Modeller, deene Leit kann ech de Calculateur un d'Häerz leeën, dee se kënnen fannen um Site vun der Zukunftskeess ënnert der Adress [www.cae.public.lu](http://www.cae.public.lu).

D'Gesetz gesäit och vir, dass d'Elteren, déi hir Demande scho gemaach hunn, mä deenen hire Congé parental eréischt nom Akraafttriede vum Gesetz ufänkt, kënnen eng nei Demande maachen, fir eventuell vun deenen neie Modeller ze profitéieren. Dee Moment sinn d'Délaien acquis, déi ee muss respektéieren, fir eng Demande ze maachen, mä de Patron kann awer deen neie Modell refuséieren. Da fält den Elterendeel automatesch op dee Modell zrëck, dee mam Patron ausgemaach gi war an deen och accordéiert gi war.

Fir de Leit entgéintzekommen, déi an hirem ugefrote Modell wëlle bleiwen, also sechs Méint oder zwielef Méint hallef, awer vum neie Revenu wëlle profitéieren, gesäit eng weider Dispositioun vir, dass se sech par lettre recommandée kënnen bei der Zukunftskeess mellen, wuelverstane wann de Congé parental nom Akraafttriede vum Gesetz, dat heescht ab dem 1. Dezember, a Kraaft trëtt.

Fir all weider Informatiounen, wat d'Avis vum de Berufskummeren ugeet oder d'Avis vum Conseil d'Etat, verweisen ech op mäi schrëftleche Rapport.

Ech wëll awer drop hiweisen, dass d'Kolleege vun der CSV am September fënnf Amendementer virgeluecht hunn, déi eng nach méi grouss Flexibilisatioun virgesinn haten, an och de Wëllen ausgedréckt hunn, beim uniformen Tarif ze bleiwen. Net nëmme aus Zäitgrënn, mä besonnesch well dëst Gesetz - an ech ënnerpräichen dat nach eng Käier - op engem ausgehandelten Accord mat de Gewerkschaften an de Patronatsvertreider baséiert, goufen dës Amendementer net ugeholl.

Well dëst Gesetz awer just eng weider Etapp ass a bestëmmt och net fir d'Éiwegkeet gëllt, hu mir eis parteiwwergräifend géeneegt, eng Motioun eranzereechen, wou mer d'Regierung opfuere, an dräi Joer e Bilan ze maache vun deenen neie Mesuren an och weider Weeër ze sichen, fir de Congé parental nach méi flexibel kënnen ze maachen. An, Här President, erlaabt mer, dass ech lech hei déi Motioun iwwerreechen.

#### Motion 1

*La Chambre des Députés,*

*considérant*

*- que la conciliation entre vie professionnelle et familiale est depuis longtemps une priorité politique;*

*- que les mesures mises en œuvre pour atteindre cet objectif doivent s'adapter le mieux possible aux besoins des familles;*

*- que le sondage effectué à la demande du Ministère de la Famille, de l'Intégration et à la Grande Région en vue de la réforme du congé parental a identifié certains motifs de renonciation au congé parental;*

*- que le projet de loi 6935 portant réforme du congé parental vise à répondre aux besoins exprimés par les parents en ce qu'il*

*- flexibilise les modèles et les périodes de congé parental,*

*- étend le cercle des bénéficiaires potentiels en allégeant les conditions d'octroi,*

*- incite plus de parents à prendre un congé parental;*

*- qu'il importe de continuer l'analyse des moyens mis en œuvre pour concilier vie professionnelle et vie privée, y compris en tenant compte des amendements et propositions faits au cours des travaux parlementaires;*

*- que déjà la loi du 12 février 1999 portant création d'un congé parental et d'un congé pour raisons familiales prévoyait dans son article 19 une évaluation des effets des dispositions portant notamment sur l'incidence du congé parental sur le marché de l'emploi, ses effets sur l'égalité des chances et ses effets dans l'intérêt de l'enfant;*

*invite le Gouvernement*

*- à dresser un bilan du nouveau système du congé parental après une période de trois années et à évaluer les différents modèles proposés aux parents;*

*- à présenter, le cas échéant, des propositions d'adaptation.*

(s.) Gilles Baum, Taina Bofferding, Françoise Hetto-Gaasch, Fernand Kartheiser, Roberto Traversini.

Da wëllt ech ofschléisse mat engem ganz grouse Merci un alleguer d'Kommissiounsmitglieder, déi ganz, ganz äifreg matgeschafft hunn un den Aarbechten, un eise ganz fläisseg Sekretär, den Här Jean-Paul Bever, fir seng gutt Aarbecht, an e ganz besonnesche Merci och un d'Madamm Myriam Schanck, déi Presidentin ass vun der Zukunftskeess, déi eis mat ganz vill Sachverstand duerch dëse ganz wichtigen an och immens flotte Projet begleet huet.

Ech soen lech alleguerten e grouse Merci.

► **Plusieurs voix.** - Très bien!

► **M. Mars Di Bartolomeo,** *Président.* - Merci. An den Här Rapporteur hätt och nach der Chamber kënnen Merci soen, dass se him e puer Minutte méi Riedezäit ginn huet.

**(Interruptions et hilarité)**

Voilà, dat gesot, ginn ech d'Wuert dann direkt weider un d'Madamm Françoise Hetto fir d'CSV.

#### Discussion générale

► **Mme Françoise Hetto-Gaasch** (CSV). - Här President, Dir Dammen an Dir Hären, ech wëll fir d'Éischt dem Rapporteur, dem Gilles Baum, e grouse Merci soe fir säi ganz ausféierleche souwuel schrëftleche wéi och mündleche Rapport. Erlaabt mer vläicht, fir am Ufank e klengen, wierklech e ganz klenge Réckbléck ze maachen.

De Congé parental, deen ass hei am Land agefouert ginn opgrond vun enger, wéi Dir et och gesot hutt, EU-Direktiv vum 3. Juni 1996, déi en individuellt Recht vu minimum dräi Méint Congé parental fir all Elterendeel, dee schafft, am Fong geholl garantéiert. An dat ass e Recht, dat doduerch entsteet, dass een e Kand kritt oder e Kand adoptéiert. Déi Direktiv ass hei zu Lëtzebuerg duerch d'Gesetz vum 12. Februar 1999 transposéiert ginn.

Loosst mech drun erënneren, dass dee Congé parental deemools als en neit an och zousätzleche Instrument fir d'Bekämpfung vum Chômage ugesi ginn ass. De Congé parental sollt näamlech dozou dengen, fir Chômeuren oder Leit ouni Aarbecht als Remplaçanten ebe fir deen Zäitraum ze rekrutéieren, wou eng Aarbechtsplaz duerch e Congé parental net besat wier.

D'Etüd iwwert de Congé parental vun 2002 huet awer besonnesch déi familjepolitesch Aspekter wéi och déi vun der Chancëgläichheet als ganz positiv ervirgestrach. D'Ziler vum Congé parental si manner beschäftegungspolitescher Natur, mä éischer familjepolitescher Natur. En plus droe se dozou bäi - an do gëtt d'Chancëgläichheetsministesch mer bestëmmt recht -, dass mer iwwert dëse Wee der Chancëgläichheet tëschent Fra a Mann och e Stéck méi no kommen.

D'Famill kritt mam Congé parental déi Ënnerstützung vum Stat, déi hir och zousteet. Mir hunn als CSV nach ëmmer d'Meenung vertrueden an eis Politik och dorobber ausgeriicht, dass een den Eltere soll de Choix loosse, dass een den Eltere soll all Méiglechkeeten oploosen, wéi si hiert Familjeliewe wëlle gestalten, ob si fir e Congé parental optéieren oder net, ob si ganz doheem bleiwen, fir sech selwer ëm d'Erzéiung vun hire Kanner ze bekëmmern, oder ob si Deelzäit oder ganzdaags schaffe ginn an op Famill, Betreuungsstrukturen oder awer och Dageselteren zrëckgräifen.

Déi ganz Diskussioun ronderëm de Congé parental muss een awer och kucken an engem Gesamtkontext vun éischters Aarbechtszäiten, déi besser op d'Conciliatioun vu Famill a Berufsliewe mussen ofgestëmmt ginn, a vun zweetens alle méigleche Formen u flexibele Betreuungsmaassnahmen.

Ech wëll op dëser Plaz drun erënneren, dass an deenen zwou leschte Regierungen immens vill Effort gemaach gi sinn, wat souwuel d'Crèche wéi och d'Betreiung vun de Kanner ubelaangt, déi am Schoulalter sinn. Et gouf e Statut fir Dagesmammen agefouert, fir domadder wierklech och e breede Spektrum u méigleche Betreuungsmodeller ze offéieren.

Här President, Dir Dammen an Dir Hären, de Congé parental stellt net nëmme e Recht duer fir all Elterendeel, e stellt awer och eng Erausforderung duer fir all Patron vun enger Entreprise. Wat de Volet Aarbechtszäitorganisatioun ubelaangt, do bleift nach villes ze maachen, well déi ganz Conciliatioun Famill a Beruf, déi hânt wierklech maassgeblech dovunner of, wi vill Optiounen een als Elteren huet, fir de Spagat tëschent Famill a Beruf dann och ze realiséieren.

Duerfir hu mir als CSV an der Kommissioun och eng Rei Amendementer an deem Sënn proposéiert gehat. Ech komme gläich dorobber zrëck.

Ech wëll awer op dëser Plaz och mäi Respekt ausdrécke fir all déi Patronen an Entreprises, déi wierklech hiert Beschäft maachen, fir dass hir Mataarbechter de Congé parental kënnen huelen, déi och d'Décisiounen vun den Eltere respektéieren, ouni dass dat Konsequenzen op deenen hir zukünfteg Carrière huet. Et ass





sécherlech net einfach, de Congé parental an déi betriiblech Organisatioun mat anzebauen, ganz besonnesch net fir déi méi kleng Entrepreisen. Mir sinn eis och bewosst, dass et Betriber gëtt, déi de Wënsch vun hire Salariée méi einfach kënnen nokomme wéi anerer, net well déi et net wëllen, mä well si et einfach organisatoresch gesinn net hikréien.

Et ass och begrëssenswäert, dass d'ABBL gëschter eng Absichtserklärung ënnerschriwwen huet, dass een dann an Zukunft kann de Remboursement vum Immobilieprêt während der Zäit vum Congé parental ënnerbriechen.

Här President, Dir Dammen an Dir Hären, mat dësem Gesetzestext ginn eng ganz Partie Adaptatiounen vum aktuelle Congé parental gemaach. Engersäits gëtt déi aktuell Indemnitéit duerch e Revenu de remplacement ersat, an anersäits kréien d'Elteren an Zukunft d'Méiglechkeet, fir en dach awer méi flexibel Congé parental ze huelen.

Mir sinn als CSV och der Meenung, dass et wierklech Zäit war, de Congé parental ze iwwerkucken an ze iwwerschaffen. Allerdéngs hätt ee kënnen dës Reform notzen, fir e Stéck méi wäit ze goen a méi eng grouss Palett u flexibele Méiglechkeeten unzibidden. Zanter dass de Congé parental agefouert ginn ass, kann ee feststellen, dass ëmmer méi Mammen a Pappen dovunner Gebrauch maachen. An dat ass och gutt esou. 2001 waren et ronn 30% vun den Elteren, déi de Congé parental geholl hunn. Abee, 2014 si mer awer trotzdem scho bei 44,1%.

Am mannst gëtt en allerdéngs genotzt vun de Monoparentallen. An dass net méi Elteren de Congé parental huelen, dat huet natierlech och verschidden Ursachen. Fir déi eng ass, wéi et gesot ginn ass, de Montant vun der Indemnitéit ze niddreg fir de Fall, wou se e géife ganz beieneen huelen. Anerer fäerten, hir Carrière géif duerch de Congé parental dach awer e Knécks kréien. Fir anerer ass et awer och dacks en No-Go vusäite vum Patron. A fir nach anerer ass en, esou wéi mer e bis elo haten, ganz einfach vill ze vill rigid.

Mir begrëssen als CSV prinzipiell all Mesure, déi drop ausgeriicht ass, den Elteren d'Liewe manner schwéier ze maachen an hinnen et och ze erlaben, méi Zäit mat hire Kanner ze verbréngen. Duerfir begrësse mir et och, dass d'Regierung higeet an de Congé parental méi flexibel wëllt gestalten.

Mir haten an eisem Wahlprogramm stoen, dass mer d'Veerenbarkeet vu Famill a Beruff wëllt verbesseren iwwert de Wee vu méi enger flexibeler Aarbechtszäitorganisatioun. An do kënnen natierlech e flexibele Congé parental an eng aner Aarbechtszäitorganisatioun doudsécher derzou bäidroen.

Flexibilisatioun an Aménagement vun der Aarbechtszäit gehéieren zum Zäitgeescht. D'Patronat ass jo am Prinzip och mat enger Reform vum Congé parental am Sënn vun méi Flexibilitéit d'accord, hätt sech awer gewünscht, dass déi Diskussiounen iwwert d'Aarbechtszäitorganisatioun parallell gefouert gi wieren an dass een am Fong geholl op deem Ganzen e Konsens fonnt hätt.

Mir bedauern, dass dat net geschitt ass, well mir sinn och iwwerzeegt, dass een, wann dat de Fall gewiescht wier, nach hätt kënnen ganz aner Méiglechkeete fir de Congé parental erausschelen. An dës Reform wier do derduerch méi ambitiéis ginn.

Duerfir hate mir och eng Partie Amendementer proposéiert, déi dem Wënsch vu ganz villen Elteren ganz bestëmmt entgéintkommen wieren. Mir schwätzen hei vill iwwert d'Elteren. Mir al-leguer wäerten haut de Mëtte vill iwwert d'Elteren schwätzen a wéi een et fir si ka besser organiséieren, mä ech wëll awer op dëser Plaz och ee Wuert iwwert dee kleng Mënsch soen, ëm deen et am Fong geholl geet: d'Kand.

Déi éischt dausend Deeg am Liewe vun engem Kand sinn entscheidend, wat de physischen a psycheschen Bien-être fir de Rescht vu sengem Liewen ubelaangt. Dausend Deeg, dat sinn néng Méint Schwangerschaft an eppes méi wéi zwee Liewensjoren. D'Bindungsfäegkeet fänkt am Bauch vun der Mamm un. Déi éischt zwee Liewensjore festegt de Puppelchen dann d'Liene mat senger Bezuchspersonen, am Idealfall den Elteren. Déi éischt Jore sinn entscheidend, de Rapporteur huet dat och ënnerstrach, an duerfir sollt een och dës jonken Eltere wierklech d'Chance ginn, déi éischt Zäit, déi éischt Joren esou vill wéi méiglech Zäit mat hirem Puppelchen ze verbréngen.

Dat ass och de Wënsch vu ganz villen Elteren. Jonk Eltere wëllen dee Stress, dee sech ergëtt duerch d'Jongléieren tëschent Famill a Beruff, einfach net méi hinhalen. Vun den Eleng-erzéier guer net ze schwätzen!

Fir dass eng Famill awer kann zu enger Famill zesummewuessen, brauch se Zäit. Dohier muss et méiglech ginn, duerch en dach awer flexible Congé parental seng Aarbechtszäit esou anzedeelen, dass all Famill sech hir ënnerschiddlech Liewensart a -weis kann erméiglechen, sech awer och hiren Job ka sécheren, am Aarbechtsprozess mat drableiwen an awer iwwer e puer Jore genuch Zäit huet, fir mat deem neie kleng Familljemember eng enk Relatioun opzebauen.

D'Patronen hu jo eigentlech och all Interessé drun, hire Leit entgéintzekommen, well zefridde Salariée sti gemengerhand dem Betrib trei zur Säit. D'Betriber, déi net kënnen duerch héich Léin Leit unzéien, kënnen dat awer eventuell duerch interessant a familljefrëndlech Aarbechtszäitmanagement maachen. Et huet deemno jiddwereen eppes drun ze gewinnen. A vu dass de Gesetzestext souwiso virgesäit, dass de Patron muss fir all Flexibilisatioun säin Accord ginn, sollt een et dem Patron an dem Salarié iwwerloossen, eng fir si agreabel Léisung ze fannen. Op alle Fall sollen et net legislativ Barrieren sinn, déi der Flexibilitéit am Wee stinn.

Duerch eis Amendementer, déi leider net ugeholl gi sinn, hätten d'Elteren an d'Kand méi Zäit firenee kritt. Si hätten vill méi eng breet Palett vu Méiglechkeete gehat, an dat ouni dass et de Stat méi deier gi wier. Am Géigendeel. A propos Käschten, do kommen ech och nach drop ze schwätzen.

Mir wollten den Elteren de Choix ginn, tëschent dräi verschiddene Congé-parentallen ze wielen: véier Méint ganz, sechs Méint ganz oder souguer aacht Méint Congé parental temps plein. Dierneft hätt een dës dräi Formen och nach kënnen fraktionéieren. D'Leit, déi plein temps schaffen, hätten kënnen mat eisen Amendementer innerhalb vun deem Congé parental, dee fir si a Fro kënn, ufroen, net just fir zur Halschent, och net just fir zu 80% schaffen ze goen, esou wéi et elo virgesinn ass, neen, no eise Virstellungen hätte si kënnen carrément tëschent enger Palett vun 20%, 40%, 50%, 60% an 80% wielen. Zu allem hätt natierlech de Patron säin Accord misse ginn. E muss dat jo mam neien Text souwiso maachen.

Mir sinn der Meenung, an de Sondage beweist et och, dass d'Eltere sech prioritär méi Zäit, méi Flexibilitéit wënschen an net un éischter Stell méi Indemnitéit. Eis Amendementer hätten e grouse Choix erméiglecht.

Dobäi muss een awer och soen, dass de Choix fir Flexibilitéit, zum Beispill dee Moment, wou ee sech derfir decidéiert, 80% schaffen ze goen an 20% vum Congé parental ze profitéieren, dass dat op Käschte geet vun der Zäit. Well et dierf een net iwwer 30 Méint 80% schaffe goen, esou wéi dat engem am Fong geholl géif zoustoen, wann een dat vun de sechs Méint ëmrechent, mä just während 20 Méint.

Zweetens, d'Regierung gesäit vir, déi forfaitaire Indemnitéit duerch e Revenu de remplacement, deen op 3.200 Euro brutto maximal fixéiert ass, ze ersetzen. Mir als CSV, mir halen un deem aktuellen indemnitaire System fest. Wéi sou?

Ma mir sinn der Meenung, dass eng Indemnitéit, déi een am Kader vum Congé parental kritt, net sollt vu Persoun zu Persoun variéieren. Mir mengen, dass de Revenu de remplacement, esou wéi d'Gesetz en dann elo festhält, géint de Gläichheetsprinzip, deen an der Verfassung verankert ass, verstéisst. Fir eis huet d'Erzéiungsaarbecht vun allen Elteren deeselwecht Wäert. D'ailleurs ass dat och esou an deenen anere Länner. Et kann net sinn, dass deem enge seng Elterenaarbecht méi Wäert huet wéi deem anere seng.

En plus sinn déi 3.200 Euro, déi ëmmer an d'Fenster gestallt ginn, net netto. Do gi jo d'Steieren nach of, d'Zuillaaschte ginn nach of. Keen, awer och wierklech kee Wäert 3.200 Euro erauskéien! Mir als CSV wollten duerfir de Montant vun der Indemnitéit fir all Eltere gläich loossen an um Niveau vum onqualifizéierte Mindestloun festmaachen. An dovunner géif ausser deenen 2,8% fir d'Krankekeess an 1,4% Assurance dépendance näischt ofgezu ginn. Amplaz vu méi Suen hätte mir méi Zäit offréiert, wann dat da vun den Elteren gewünscht gewiescht wier. Mä wéi gesot, eis Amendementer si leider net ugeholl ginn.

Ech sinn awer trotzdem frou, dass se op iergendeng Aart a Weis den Nidderschlag fannen an enger gemeinsamer Motioun, wou mer dann an dräi Jore wäerte kucken, wéi dat Ganz, wat mer elo dann haut wäerte stëmmen - mir wäerten eis enthalten -, wéi dat da bei de Leit ukënn.

Mir wieren natierlech nach méi frou gewiescht, wann eis Amendementer adoptéiert gi wieren. Awer mir si wierklech net domadder averstanen, dass hei verschidde Revenuen wäerten ausbezuel ginn. Ech denken och drun, dass déi Leit, déi an Zukunft dat mussen ausrechnen, dass déi nach ganz vill Freed kréie bei deene Berechnungen.

An et ass och net esou, Madamm Minister, wéi Dir gesot hutt, dass et och am Congé de maternité géife verschidde Valeuren ginn. De Congé de maternité, dee gëtt iwwert d'Krankekeess bezuelt. Dorobber gëtt cotiséiert am Pro-rata zum Salaire an och jee nodeem, ob ee Fonctionnaire ass, ob een am Privatsecteur schafft oder ob een Indépendant ass. An de Congé parental ass eng Prestation familiale, wourobber een 2,8% Krankekeess an 1,4% Assurance dépendance bezilt. Et kann een deemno net Appel mat Bire vergläichen.

Mir bedauern awer och, dass hei - an dat ass awer och e wesentleche Punkt - keng seriö Käschteberechnung gemaach ginn ass respektiv keng seriö Estimatioun. Am Géigendeel!

An der Fiche financière gëtt sech op zwou Hypothese beruff, wou 50% vun de Salariéen, déi sech fir de Congé parental plein temps decidéieren, sech géife fir e Congé parental vu véier Méint decidéieren, a wou 50% vun de Salariéen, déi fir e Congé parental mi-temps sech géifen entscheiden, op dee vun aacht Méint géifen zréckgräifen. Dat heescht: Dir gitt der-vun aus, dass d'Halschent sech fir dee méi kuerze Congé parental entscheet. Abee, dat ass op jidde Fall och dee Modell, deen de Stat am mannst wäert kaschten an awer, an Ären Zee-narien, 15 bis 29 Milliounen méi wäert kaschten, wéi dat bis elo de Fall ass.

► **Une voix.** - Très bien!

► **Mme Françoise Hetto-Gaasch** (CSV). - Ech géif dann natierlech nawell gäre wëssen, Madamm Minister, wat géif dann ufalen u Käschten, wann d'Majoritéit vun de Leit sech géif fir déi deierst Versioun decidéieren, sechs Méint ganz oder zwielef Méint hallef, well schliisslech, Dir erhofft lech dat jo, wäerten dann och méi Pappen an Zukunft de Congé parental wëllen huelen, well se sech duerch déi méi héich Indemnitéit ugezu spieren.

An deene ganzen Estimatiounen steet och kee Wuert driwwer, a wéi engem Mooss dass de Plus u Steieren, déi dach awer wäerten et erakommen, säin Nidderschlag fënnt. Et ass ganz einfach keng seriö Estimatioun.

Nach just ee Wuert zur Proposition vun de véier Méint Congé parental respektiv véiermol ee Mount. Mir sinn als CSV der Meenung, dass een den Elteren net soll manner Zäit ubidden, fir mat dem Kand ze verbréngen, mä éischter méi. Ech fäerten näamlech, dass mer hei duerch dës Alternativ kënnen e gewëssenen Drock kreéieren an deem Sënn, dass d'Patronen hire Leit soen, jo, si sollt sech da vläicht léiwer fir déi véier Méint decidéieren amplaz fir déi sechs Méint, well dat fir de Betrib méi einfach ze organiséieren ass.

Här President, Dir Dammen an Dir Hären, aus all dës verschiddenen Ursachen, déi ech elo opgezielt hunn, wäerte mir eis bei dem Vott iwwert dës Gesetz enthalten.

Ech soen lech Merci fir d'Nolauschtenen.

► **Plusieurs voix.** - Très bien!

► **M. Mars Di Bartolomeo, Président.** - Merci och der Madamm Hetto. An nächsten ageschriwwene Riedner ass den Här Max Hahn. Dir hutt d'Wuert, Här Hahn, fir d'DP.

► **M. Max Hahn** (DP). - „An, wéini ass et da bei dir esou wäit?“ Jo, dës Fro kritt een a mengem Alter alt emol gestallt.

(**Brouhaha**)

Dorobber, léif Kolleegen, wäert ech lech awer keng Äntwert ginn.

► **M. Mars Di Bartolomeo, Président.** - Mir hunn lech jo och net gefrot.

► **M. Max Hahn** (DP). - Ech wäert villméi op déi Froen agoen, déi ee sech an deem Kontext a mengem Alter stellt.

Haut, an dovun sinn ech iwwerzeegt, gëtt e Gesetz gestëmmt, dat de Congé parental däitlech méi attraktiv wäert maachen. Dat huet zwar bestëmmt keen Afloss op de Kannerwënsch vun enger Koppel, well ech mengen net, dass d'Leit méi oder manner Kanner wëllen, deemno wéi de Congé parental geregelt ass. Mä et beaflosst d'Elteren awer bei der Äntwert op eng aner Fro. D'Fro, déi jonk Famillje sech näamlech stellen, ass déi heiten: Hëlt een de Congé parental? Oder hëlt een en net?

Natierlech wëllt ee méi Zäit mat sengem Kand verbréngen. An trotzdem muss een d'Rechnung maachen, ob de Congé parental net ze vill Nodeeler an Abousse fir ee selwer a seng Famill bedeit. D'Zil vun dëser Reform ass, dass

vill méi Elteren, a besonnesch vill méi Pappen, den zweete Congé parental huele wäerten. D'Zil ass et, dass a fënnf bis zéng Jore den zweete Congé parental esou oft geholl gëtt wéi deen éischten. Dass d'lescht Jore den zweete Congé parental just a 34% vun de Fäll geholl ginn ass, weist, wéi ambitiéis d'Zil vun dëser Reform ass.

Här President, et heescht, den neie Congé parental gëtt den haitege Gegebenheeten ugepasst. Mä wat sinn dann déi haitege Gegebenheeten? Haut ass d'Rolleverdeelung am Stot eng aner wéi nach bei mengen Elteren. Deemools war et näamlech ganz oft esou, dass de Mann schafft gaangen ass an d'Fra doheim bliwwen ass, fir d'Kanner grousszezéien. Hautdesdaags ginn déi zwee aus der Koppel schaffen a wann den Nowuess bis do ass, bliwen déi Allervéinegst nach ganz doheim beim Kand.

Dat huet haaptsächlech zwou Ursachen: éischters, d'Finanzen an déi eege sozial Of-sécherung, och wann d'Bezéiung emol an d'Bréch geet, an zweetens de Wënsch, säi Beruff op d'mannst deelweis auszeüben, well en engem Spaass mécht an ee perséinlech erfüllt. An do, léif Frënn, gëtt et tëschent Fraen a Manner keen Ënnerschied.

Ech stellen a mengem Frëndes- a Familljekrees awer nach ee groussen Ënnerschied zu fréier fest: Hautdesdaags wëllen d'Pappe méi an d'Erzéiung vun hire Kanner agebonne ginn. An dat ass och gutt esou! D'Experte si sech hei eens, dass hei grad déi éischt Joren enorm wichteg sinn. An awer, et si grad d'Pappen, déi de Congé parental net huelen. Mä firwat ass dat dann esou?

Ma d'Grënn, firwat haaptsächlech deen éischte Congé parental geholl gëtt an deen zweete vill manner, sinn en gros déiselwech wéi déi, firwat hautdesdaags dacks keen Elterendeel ganz doheim bleift. Ech widerhuele mech: Dat sinn éischters d'Finanzen an d'sozial Of-sécherung an zweetens de Wënsch, säi Beruff op d'mannst deelweis auszeüben. A grad op dës zwou Ursachen äntwert d'Reform.

Wat d'Finanzen ugeet, ass deen nei agefouerten Ersatzloun vum Congé parental méi no un där normaler Pai vun den Elteren, wat et grad der Mëttelschicht finanziell och erlaabt, de Congé parental ze huelen. Et dierf een net vergiessen, dass rezent e Sondage realiséiert gouf, deen ervirgehuewen huet, dass bal d'Halschent vun deene gefrote Leit, déi de Congé parental net geholl hunn, dës Entscheidung getraff hunn, well se sech de Congé parental finanziell net leeschte konnten.

Wat de Wënsch ugeet, säi Beruff op d'mannst deelweis auszeüben, esou gëtt deem mat enger Erhéijung vun der Flexibilitéit, wéi een de Congé parental huele kann, Rechnung gedroen. Hei wäert een an Zukunft tëschent véier zousätzleche Modeller kënnen entscheiden. Déi zousätzlech Modeller wäerten de Mammen an de Pappen entgéintkommen, déi vläicht net sechs Méint Ganzzäit am Congé parental wëlle sinn. Ech denken do un déi Elteren, déi an engem dynameschen Secteur schaffen, wou sechs Méint eng laang Zäit sinn, an där zum Beispill Projeten ofgeschloss ginn an nei Projeten entstinn, un deene si wëllen deelhuelen. Véier Méint um Stéck, véier Méint verdeelt oder een Dag d'Woch, dat erméiglecht et, kee Choix tëschent dem Kand an der Aarbecht mussen ze treffen.

Fir Famill a Beruff besser ënner een Hutt ze kréien, ass an esou Fäll besonnesch d'Formule, fir de Congé parental während 20 Méint een Dag d'Woch ze huelen, eng flott Optioun fir Employé a Patron. Dat entsprécht enger Tache vun 80%. Gekoppelt mam Bruttoersatzrevenu vu bis zu 3.200 Euro, ass de finanziellen Aschnëtt fir d'Mëttelschicht also wesentlech méi kleng, wéi dat aktuell de Fall ass.

Här President, erlaabt mer e kuerzen Ausflug an d'Vergaangenheet. 1999 gouf de Congé parental agefouert, dat mat deenen zwee Modeller, wéi mir se bis haut kennen: sechs Méint Ganzzäit an den zwielef Méint Hallefzäit. Dat si mëttlerweil ëmmerhi 17 Jore hier, 17 Jore, vun deenen d'CSV 14 Jore laang de Familljeresort besat huet an näischt heiru geännert huet. Ech wëll net polemesch ginn,...

(**Hilarité**)

...mä ech war dowéinst virun engem Mount verwonnert, dass d'Reform darselwechter CSV net flexibel genuch war, obwuel d'Reform véier zousätzlech Variante virgesäit. Wann déi flexibel Modeller hinnen esou wichteg sinn, stellen ech mer just d'Fro, firwat si dat net scho méi fréi proposéiert an och ëmgeännert hunn!

Ech freeë mech op alle Fall, dass et elo och der CSV wichteg ass, de Congé parental méi ze flexibiliséieren.

(**Interruption**)

An natierlech hätt ee mat der Flexibilitéit nach méi wäit kënnen goen. Et dierf een awer net





vergiessen, dass d'Ministesch dëst Gesetz net an der Dunkelkammer ausgeschafft huet a geschriwwen huet, mä de virleiede Gesetzestext mat de Sozialpartner ausgehandelt huet, woufir ech der Ministesch, awer och der ganzer Regierung op dëser Plaz félicitéiere wëll.

► **Une voix.**- Très bien!

► **M. Max Hahn (DP).**- Wat d'Flexibilitéit ugeet, schéngt d'CSV sech jo an déiselwecht Richtung ze bewege wéi mir.

► **Une voix.**- Très bien!

► **M. Max Hahn (DP).**- Nieft dem spéide Wonsch no méi Flexibilitéit hält d'CSV awer un der Iddi vun engem eenheetleche Montant fest a géif deemno léiwer bei engem vill méi niddrege Montant bleiwen. Abee, mir maachen do eng aner Analys. En eenheetleche Montant léist de Problem net, dass vill Eltere sech de Congé parental finanziell net erlabe kënnen. Grad d'Upasse vum Montant un de reelle Loun mat engem Maximum vun 3.200 Euro brutto erméiglecht et eréischt ville Leit mat engem mëttleren Akommes, de Congé parental an Usproch ze huelen.

D'CSV argumentéiert, dass d'Erzéiungsaarbecht mam nämlechte Montant soll bezuelt ginn. Wa si doranner kohärent wier, misst si dat jo och fir de Congé de maternité an de Congé d'allaitement froen. Hei kritt ee jo och keen eenheetleche Montant während den aacht respektiv zwielf Wochen no der Gebuert ausbezueelt, mä de volle Salaire. Dat ze ännerer wier zwar genau sou kontraproduktiv, mä op d'mannst wier et kohärent.

(**Interruption**)

Ech bleiwen derbäi: E méi en niddregen eenheetleche Montant léist eise Problem net, well vill Eltere sech de Congé parental weiderhin net leeschte kéinten. Ech wëll awer och betounen, dass och méi en héijen eenheetleche Montant net d'Léisung wier, well mir domat falsch Ureizer géife schafen, wa verschidde Leit méi Suen iwwert de Congé parental ausbezueelt géife kréie wéi si verdéngen, wa se schaffen.

Här President, d'Reform, iwwert déi mer haut schwätzen an déi gestëmmt wäert ginn, ass e Meilesteen an der Familljepolitik. D'Reform dréit ganz kloer der Realitéit Rechnung, fir datt an Zukunft méi Leit an och méi Pappe sech fir de Congé parental kënnen entscheiden.

Fir sech matzäiten un d'Besoine vun den Eltere kënnen unzepassen, begréisst d'Demokratesch Partei d'Motioun, déi de Rapporteur déposéiert huet. Et ass nämlech wichteg, an e puer Joer eng Bestandsopnam ze maachen, fir dee System kënnen ze evaluéieren an eventuell och Upassungen ze maachen.

Dem Rapporteur Gilles Baum a Parteikolleg wëll ech selbstverständlech am Numm vun eiser ganzer Fraktioun en décke Merci soe fir säin exzellente schrëftlechen awer och mündleche Rapport. An ech ginn dann heimat den Accord vun eiser Fraktioun.

► **Une voix.**- Très bien!

► **M. Mars Di Bartolomeo, Président.**- Nächst ageschriwwen Riednerin ass d'Madamm Taina Bofferding fir d'LSAP.

► **Mme Taina Bofferding (LSAP).**- Här President, Dir Dammen an Dir Härren, haut gi mer weider an d'Richtung vun enger moderner Familljepolitik an dat ass e gutt Signal fir d'Familljen hei am Land. Eier ech op déi eenzel Elementer aus der Reform aginn, wëll ech vun der Geleeënheet profitéieren an dem Rapporteur, dem Deputéierte Gilles Baum, Merci soe fir säin ausféierleche mündlechen a schrëftleche Rapport.

D'LSAP begréisst dës Reform, well domadder erméigleche mer: éischstens, dass méi Eltere wäerten an de Genoss vum Congé parental kommen; zweetens, méi Wahlméiglechkeeten, fir Beruff a Famill besser openeen ofzestëmmen; drëttens, méi Zäit fir d'Familljen. Véierens erméigleche mer och méi Sue fir d'Familljen a fénneftens wäerte mer och der Chancëgläichheet e gutt Stéck entgéintkommen.

D'Vereenbarkeet vu Beruff a Famill ass fir meng Partei e ganz grouse Sujet. Mir engagéieren eis fir Mesuren, déi den Eltere sollen hëllefen, Famill a Beruff besser an Aklang ze bréngen. Et gëtt ëmmer méi Familljen, wou béid Elterendeeler schaffen. An hirer Virstellung vun engem gudden Liewe gëtt et déi zwee: Zäit fir d'Famill an Zäit fir de Beruff. Si erwaarden - an ech mengen, dat zu Recht - vun der Politik, dass si se ënnerstëtzt an hir Liewensrealitéit verbessert.

Mat enger Auszäit erméigleche mer et den Elteren, hiren Job virleefeg ze ënnerbrechen oder zrëckzeschrauwen, fir esou méi Zäit ze hunn, fir sech intensiv ëm hiert klengt Kand ze këmmen. Wéi déi Zäit sech gestalt, wéi ee sech organiséiert, dat soll vun de Besoinen ofhänken, déi d'Familljen an och d'Betriben

hunn. Et geet eben drëms, sech esou ze organiséieren, dass béid Säiten dovunner kënnen profitéieren.

Dobäi sollte mer net vergiessen, dass och spéider am Liewe vun engem Kand, also den éischte Liewensjoren, et Phase gëtt, an deenen d'Elteren och méi Zäit fir hiert Kand brauchen. An et ass wichteg, dass si och déi Zäit kréien. An dofir kënnen Elteren an Zukunft de Congé parental bis dat sechst Liewensjoer vum Kand huele respektiv, am Fall vun enger Adoptioun, bis zwielf Joer.

Eng grouss Verbesserung, déi mer haut schafen, ass d'Flexibiliséierung vun der Elterenzäit. Hei komme mer ganz kloer de schaffenden Elteren entgéint. De Wonsch no Flexibiliséierung koum am Sondage, deen am Virfeld vun der Reform gemaach gouf, ganz kloer eraus. Et ass richtig, dass bei der Opspléckung am Verglach zu deenen zwee anere Modeller manner Deeg wäerten zur Verfügung stoen. Dofir hunn d'Elteren awer bei der flexibiliséierter Form méi Choixen!

Vu Patronssäit war viru Kuerzem ze héieren - also si hunn erëm déi flexibiliséiert Form kritiséiert -, dass et fir d'Betriben extrem schwiereg wier, sech ze organiséieren, wann e Salarié een Dag an der Woch géif feelen, well ee fir deen Dag net en Ersatz kéint astellen. An et wär och net am Sënn vun der Saach, dass aner Employéen da méi Aarbecht hätten. Nun, do kéint ee jo och bal mengen, dass déi Salariéen am beschten hätten, ni krank ze ginn oder en Dag Congé ze huelen.

Ech wëll net weider op déi Ausso elo agoen, mä op deen ugeschwatene Problem ginn et awer e puer Äntwerten. Éischstens: Wa Betriben bis elo esou vill Wäert drop geluecht hätten, d'Absencen duerch e Congé parental ze ersetzen, da wär de Congé parental och beschäfteigungspolitesch genau sou um familljepolitesche Plang eng Success Story gewiescht. A mir wëssen allegueren, dass dat leider net de Fall war.

Zweetens muss ee soen, dass et och ganz vill vum Betrib grad wéi vun der Gréisst an och vun der Aktivitéit vum Betrib ofhänkt, wat een als Modell vum Congé parental arrangéiert a wat eben net. Sou hunn zum Beispill kleng Betriben aner Contrainté wéi grousser, déi, déi Schichte schaffen anerer wéi déi, déi dat net maachen. An et gëtt och Betriben, wou et effektiv méi laang dauert, fir eng Persoun nei anzuschaffen a wou dann déi sechs Méint Vollzäit-Congé-parental éischter déi schlecht Optioun duerstellen.

Dofir ass et jo och esou, dass souwuel bei der flexibiliséierter Form wéi och beim Congé parental à mi-temps nëmmen am Accord mam Patron deene Forme kann zougestëmmt ginn.

E weidere Punkt, deen am Sondage och e ganz groust Thema war, ass d'Indemnitéit. Bal d'Halschent vun den Elteren hu gesot, si hätte sech géint de Congé parental entscheet, well si e sech net hätte kënnen leeschten. Niewent dësem Aspekt wëll ech och nach eng Kéier drun erënneren, dass d'Montante vum Congé parental säit 2006 agefruer sinn.

Fir där Suerg entgéintzekommen, gëtt déi fix Indemnitéit elo duerch e Revenu de remplacement ersat. Dat huet als Virdeel, dass de Salaire weiderleeft an dass et während dem Congé parental net zu weidere groussen Aboussen an de Familljenakommesse soll kommen.

Et ass sécher falsch, et esou duerststellen, wéi wann d'Elteren nëmmen Zäit fir Kanner hätten, wa se genuch Sue géife kréien. Fakt ass awer, dass ganz vill Familljen hei am Land nun emol op zwee Akommessen, zwee Salaren ugewise sinn, fir déi lafend Käschtchen ze finanzéieren.

Vun den Oppositionsparteien ass ze héieren, dass den Ersatzrevenu d'Elteren net méi gläich géif behandelen, well se net méi deeselvechte Montant ausbezueelt kréien. Et gëtt kritiséiert, dass elo zwou Zorten Eltere géife geschafe ginn: déi mat den niddrege Paien an déi Eltere mat den héije Paien. Fakt ass awer, dass déi Differenz tëschent de Paien net eréischt duerch d'Modifikatioun am Congé parental zustane kënn. Deen Ënnerscheed, dee besteet och elo!

De Congé parental ass net geduecht, fir d'Erzéiungsaarbecht ze belounen. Den neie Congé parental huet zum Zil, en Akommesverloscht, deen eben duerch d'Reduktioun vun der Aarbechtszäit zustane kënn, ze kompenséieren. An dat ass och déi besch Manéier, fir de Congé parental villen Elteren iwwerhaupt emol zougänglech ze maachen.

Et wäerten och hoffentlech méi Pappe ginn, déi an Zukunft de Congé parental wäerten huelen, fir esou och méi Zäit mat hirem Kand kënnen ze verbréngen. Dat wäert och hoffentlech positiv Auswirkungen am Beräich vun der Chancëgläichheet hunn. Op dee Punkt kommen ech spéider nach eemol zrëck.

Begrëssen di mer och déi gemeinsam Erklärung, déi gëschter tëschent der Familljeministesch an der ÄBBL ënnerschriwwen ginn ass.

Niewent dem Aspekt vun der Stärkung vun der Relatioun zum Kand ass et och wichteg, dass den Elteren hir sozial Rechter weiderhi bestoe bleiwen. Fir meng Partei ass de Schutz vun der Aarbechtsplaz grad wéi d'Sécherheet, nom Congé parental nees op seng Plaz zrëckzekommen ouni Aboussen a senger Carrière, extrem wichteg. De Kënnegungsschutz ass iwwert déi ganz Dauer vum Congé parental, also bis maximum 20 Méint, garantéiert. Dobäi sinn dann och déi Eltere protegéiert, déi op e flexibele Modell zrëckgräfen.

A verschiddenen Aise gëtt gefuerdert, dass och schonns ab der Demande de Kënnegungsschutz soll spillen. D'LSAP hätt dat och gäre gesinn, mä leider konnt den d'Sozialpartner sech op deem Punkt net eenegen.

Ee Punkt, dee munch Elteren awer nach wäert Suerge bereeden, ass, wann een am Congé parental ass an et zu enger Faillite kënn, dass de Salarié da säi Congé parental verléiert. Natierlech sinn déi Suitten hannendrunner jee no Situatioun ganz ënnerschiddlech - déi eng fallen an de Chômage, déi aner hu vläicht méi Chance a kënnen herno vun engem Betrib iwwerholl ginn -, esou si mir awer der Meenung, dass een déi Fäll besonnesch gutt am A soll behalen a gegebenenfalls eng Kéier muss driwwer nodenken, ob net awer eng aner Léisung kéint virgesi ginn.

Ee Punkt, deen awer bestëmmt ganz vill Eltere wäert opootme loosse, ass, wann ee während dem Congé parental den Employeur wiesselt a sech berufleech verbessert, also méi verdéngt, dass een dann an Zukunft net méi déi Deeg, wou een am Congé parental war, muss zrëckbezuelen. Mat der Reform däreifen déi Leit dat, wat se kritt hunn, och da behalen.

Bis elo huet een op d'mannst 20 Stonnen d'Woch misse schaffen, fir e Recht op Congé parental ze hunn. An dat ännert. Et brauch ee just nach, an et ass scho virdru gesot ginn, et brauch ee just nach zéng Stonnen d'Woch ze schaffen. Mir fannen dat ganz gutt, well esou komme sécherlech méi Elteren an de Genoss vun engem Congé parental.

An dorënner falen eben eng ganz Partie Leit, déi manner wéi eng hallef Täsche schaffen. A well déi jo bis elo kee Recht op Congé parental haten, hu si d'Allocation d'éducation fir sech an Usproch geholl. An nodeems dës Allocatioun jo ofgeschafft gouf, erlabe mer hinne mam neie Gesetz eben en Zougang zum Congé parental.

Nei ass och, dass béid Elterendeeler zäitgläich däreifen de Congé parental huelen. An den Délai vun néng Wochen, deen huet mussen agehale ginn, fir den éischte Congé parental ze kréien, wa kee Congé de maternité oder Congé d'accueil geholl ginn ass, deen Délai gëtt och elo erofgesat. Dat heescht, dass souwuel d'Pappen net méi esou laang mussen waarden, fir an den éischte Congé parental ze goen, wéi och Elteren, déi hiert Kand aus enger Leihmutter-schaft hunn, net méi brauchen déi Délai vum néng Wochen ofzewaarden.

Mir begrësse weider, dass de Congé parental och elo als dat unerkannt gëtt, wat en ass, an zwar eng Familljemesure, an net méi eng Mesure am Beräich vum Travail, déi Aarbechtsplaze soll schafen, wat, wéi ech et scho virdru gesot hunn, an der Vergaangenheet nëmme ganz sielen de Fall war.

Weider bréngt dës Reform net just Fortschritter an der Vereenbarkeet vu Beruff a Famill, mä wäert och e Quantesprong a Saache Chancëgläichheet sinn, wann ebe méi Pappen an Zukunft wäerten dann de Congé parental huelen. Vill Pappe wëllen dat. Vill Pappe wëlle méi Zäit mat hirem Kand verbréngen. An dofir solle si och sensibiliséiert ginn, fir vun hirem Recht méi Gebrauch ze maachen. An domadder sollen och Ängschte virun engem negativen Impakt op déi professionell Carrière ofgebaut ginn.

Domadder erreche mer hoffentlech och en Émdenken an der Astellungspolitik. Dann hätte jonk Fraen, déi sech fir en Job virstellen, vläicht méi Chancen, well se net direkt ënner en - wéi soll ech soen? - méigleche Verdacht geroden, an nächster Zukunft eng Kéier schwanger ze ginn.

Fir vill Patronen - an dat ass leider nach ëmmer esou - ziele jonk Fraen aus bestëmmten Alterskategorien nach ëmmer als en Astellungsrisiko. Dofir eben hei d'Iwwerleeung: Wa méi Pappen de Congé parental huelen, wa sech dat zu enger Normalitéit apendelt, da wäerten an Zukunft net nëmmen d'Pappen, d'Männer manner schif bekuckt ginn, mä vläicht hunn dann och Fraen a Virstellungsgespräicher méi Chancen an - wéi soll ech soen? - ginn net méi als tickend biologesch Zäitbomme betruecht. Domadder kéime mer ganz sécherlech och der Chancëgläichheet e gutt Stéck entgéint.

Schlussendlech bleift d'Vereenbarkeet vu Beruff a vu Famill och no de Verbesserung vum Congé parental e grouse Spagat fir vill Mammen a Pappen. Mir Politikerinnen a Politiker kënnen gutt Gesetzer maachen, d'Eltere finanziell ënnerstëtzen an hinnen och méi Méiglechkeeten ubidden, an awer brauche mer och d'Volontéit vun de Patronen, fir op d'Situatioun vun den Eltere Rücksicht ze huelen. Instrumenter fir méi Flexibilitéit mussen do usetzen, wou d'Betriben kënnen flexibel ginn, an net do, wou d'Eltere mussen flexibel ginn.

D'Familljen, déi schaffend Elteren hei am Land, hunn eng familljefrëndlech Aarbechtswelt verdéngt. An dat Gutt dorunner ass, dovunner kënnen se allegueren profitéieren: D'Elteren, d'Patronen an am allermeschten d'Kanner! An dofir stëmme mir dëser Reform vum Congé parental ganz gären zou. Merci.

► **Plusieurs voix.**- Très bien!

► **M. Mars Di Bartolomeo, Président.**- Merci. An nächste Riedner ass den Här Roberto Traversini fir déi gréng.

► **M. Roberto Traversini (déi gréng).**- Grazie, Presidente. Merci dem Här Gilles Baum fir de mündlechen a schrëftleche Rapport. E war gutt, wéi ëmmer.

De Congé parental gouf 1999, also viru ronn 17 Joer, agefouert. Wat deemools prioritär als eng Moosnam fir Aarbechtsplazen ze schafen ugesi gouf, soll elo endlech zu enger familljenënnerstëtzender Moosnam reforméiert ginn. Mir begrëssen ausdrécklech, datt de Congé parental mat dësem Projet de loi endlech un d'Realitéit vum 21. Jorhonnert ugepasst gëtt. D'Vereenbarkeet vu Famill a Beruff ass e gréngen Karsujet.

Mir freeën eis, datt dat neit Gesetz d'Diskrepanzen aus dem Wee schafe wäert an de Familljen et wäert erlaben, méi Zäit mat hire Kanner ze verbréngen. Esou kënnen d'Eltere besser Bezéiungen zu hire Kanner opbauen an hiert Berufsliewe besser mat der Famill ënner een Hutt bréngen. Et mussen nun emol a ville Famillje béid Eltere schaffe goen. Ech si mer sécher, datt mat dëser Reform méi Elteren de Choix fir de Congé parental wäerten treffen.

► **Mme Viviane Loschetter (déi gréng).**- Très bien!

► **M. Roberto Traversini (déi gréng).**- An éischter Linn treffe si déi Entscheedung natierlech net weinst de Suen, mä zum Wuel vun hire Kanner! Mä ech sinn iwwerzeegt, datt dëst Gesetz duerch déi méi héich finanziell Kompensatiounen an déi vill méi grouss Flexibilitéit vill Eltere wäert iwwerzeegen, de Congé parental ze huelen, an hiren Alldag am Congé parental méi einfach mécht. Et féiert domadder och zu enger Verbesserung vum Kannerwuel. An ëm dat geet et jo hei.

Viru 17 Joer hate mer e groussen Déséquilibre a ville Familljen. D'Mamme sinn dacks aus dem Beruff erausgaangen, fir sech ëm d'Kanner ze këmmen. Si sinn dann an hirer beruflecher Carrière op de gliesene Plaffong gestouss: Si verdénge substanzuell manner a spéider feelen hinnen eventuell och nach Joren an der Pension! D'Pappen hu missen duerfir ëmsou méi fläisseg weiderschaffen, fir d'Suen ze verdéngen, këmmen sech awer wéineg ëm de Stot an hunn oft keng esou gutt Relatioun mat hire Kanner. Deen Déséquilibre besteet leider nach ëmmer a ville Familljen.

De bisherege Congé parental hätt kënnen dozou bäidroen, dat e bëssen ze änneren. Duerch, datt de Congé de maternité mam Congé parental konnt verlängert ginn, konnt den d'Elteren hir Kanner mat néng Méint an d'Crèche ginn, wat fir déi meescht Elteren duerchaus akzeptabel war an de Beruff vun der Mamm net ze laang ënnerbrach hätt. Si konnt hiert Kand och eréischt fréistens mat 15 Méint an eng Crèche ginn, wa se och den zweete Congé parental direkt geholl hunn. Dee Moment haten déi zwee Elteren d'Geleeënheet, fir ganz fréi eng gutt, zolidd Relatioun mat hirem Kand opzebauen.

Mä leider huet et net esou fonctionnéiert, op alle Fall net esou, wéi mir eis et virgestallt hunn. Éischstens gouf de Congé parental haaptsächlech vun de Frae geholl: Zanter 1999 sinn et der 64.000 a bei de Männer just 16.000. Deen Déséquilibre tëschent Mann a Fra huet sech also gewässer moossen nach verschäerft.

Haut sinn d'Fraen oft e ganz Joer aus dem Beruff eraus, wa se e Kand kréien. Vill Fraen fannen, datt dat ze laang ass a verzichten da léiwer op hire Congé. Vill Männer fannen, datt hir Famill net kann op hiert Akommes verzichten.





ten, zemools well jonk Famillje jo och oft héich Wunnengskäschten hunn. Si huelen also guer kee Congé parental.

War dee bisherege Congé parental dowéinst e Mësserfolleg? Ganz kloer: Neen! De Congé parental ass e wichtege Baustee fir eng modern Familljepolitik. Awer leider gëtt de Congé parental vill ze oft als e Luxus ugesinn, fir Leit, déi sech et leeschte kënnen, amplaz datt jiddwer-een deen hält.

De Congé parental soll eng ganz normal Etapp ginn am Liewe vun de Mammen a virun allem am Liewe vun de Pappen. Mir wënschen eis, datt de Congé parental gradesou normal fir béid Eltere gëtt, wéi et de Congé de maternité schonn haut fir d'Fraen ass. Mir sinn der Mee-nung, datt d'Pappe fréi eng enk Bezéiung zu hire Kanner kréie sollten an datt si sech intensiv mat hire Kanner auserneesetzen, fir datt mir de Frae besser Chancé ginn, fir hir Plaz am Berufs-liewen anzehuelen.

Duerfir fanne mer dës Reform vum Congé parental och esou wichteg an déi eenzel Mooss-name richteg!

Déi Etüd, déi am Virfeld gemaach gouf, huet gewisen, datt d'Leit virun allem de Congé parental net huelen, wann net déi néideg Flexi-bilitéit gebuede gëtt, fir de Congé un déi spezi-fesch Bedürfnisser vun der Famill unzepassen.

Den zweete grouse Problem, dat huet d'Etüd och gewisen, ass d'Héicht vun der Indemnitéit, déi déi jonk Eltere kréien. Wann den Énner-scheed do ze grouss ass, kënnen vill Leit sech den Akommesverloscht net leeschten oder si vläicht net bereet, déi néideg materiell Aschränkungen ze akzeptéieren.

Dës Reform geet op déi zwee wichteg Pro-blemer an. D'Mamme kréie vill méi Flexibilitéit, fir sech gläich ëm hire Beruff an hir Famill ze këmmern. Dëst ass eng grouss Verbesserung fir d'Chancëgläichheet.

► **Mme Viviane Loschetter** (*déi gréng*).- Très bien!

► **M. Roberto Traversini** (*déi gréng*).- All Ongerechtegkeete ginn natierlech net aus dem Wee geraumt, mä et ass en immens wichtege Schratt fir d'Veereinbarkeet vu Famill a Beruff fir d'Mammen a fir d'Pappen.

Duerch d'Flexibilitéit kann elo entweder e Congé vun nëmme véier Méint ganz geholl ginn oder iwwer 20 Méint verdeelt. An ech wëll do awer der Madamm Hetto soen: Dir hutt recht, datt wahrscheinlech verschidde Pappen a Mammen dann amplaz sechs Méint véier Méint wäerten huelen, mä et ass awer och esou, datt sech der vill vläicht net getraut hunn, well se hu misse sechs Méint huelen, a se sech elo wäerte méi trauen, well et der just véier sinn. Dat kann een och esou gesinn, mä et ass e Point de vue wéi mam Glas: hallef voll oder hallef eidel? Hei ass et hallef voll; op alle Fall fir eis.

► **Mme Viviane Loschetter** (*déi gréng*).- Très bien!

► **M. Roberto Traversini** (*déi gréng*).- Mir sinn och frou, datt de Congé ausgedeeent gëtt op déi Leit, déi nëmme zéng Stonnen an der Woch schaffen, wat jo meeschtens Frae sinn. Wichteg ass et och, datt d'Elteren elo d'Méiglechkeet kréien, fir de Congé parental kënnen zesummen ze huelen. Dat kënnt sécherlech ville Familljen entgéint.

Och fir d'Pappen ass et eng grouss Verbesse-rung. D'Entsiedegung vun de Leit am Congé ass vun elo u gestaffelt a kënnt domadder schonn der Indemnitéit vum Congé de mater-nité e bësse méi no. D'Eltere kënnen bis 3.204 Euro de Mount kréien. Natierlech ass dat nach net fir jiddwereen e volle Lounausgläich, awer dach schonn e substantielle Fortschrétt.

Doduerch, datt d'Entsiedegung gehéicht gëtt, müssen déi jonk Familljen, déi eventuell nach e Prêt zréckbezuelen, sech manner Suergen ëm hir Finanzze maachen a kënnen sech méi op hiren Nowuess konzentréieren. Och e grouse Merci, datt et nach eng Kéier geschter ënnerstrach ginn ass, datt ee ka bei seng Bank goen, datt d'Banken dat ënnerstëtzen, datt se op sinn, fir kënnen e puer Méint oder vläicht e bësse méi laang dee Prêt, dee se mat de Clienten a Clienten hunn... fir nach eng Kéier drop hinzeweisen, datt dat méiglech ass, quitte datt et dat scho ginn ass. Ech fannen dat op alle Fall eng absolutt flott, gutt Iddi. Duerfir Merci och duerfir!

Mir begrëssen et och ausdrécklech, datt d'Mammen an d'Pappen, déi nach ënnert dem ale System eng Demande eraginn, awer scho vum neie System kënnen profitéieren. Mir sinn awer och der Meenung, datt dësen neie Congé

parental elo net fir zéng Joer a Stee gemeesselt ass. Et ass fir eis wichteg, datt een d'Mesuren net enger gewëssener Zäit evaluéiert.

Et geet hei ëm d'Effikassitéit an datt mir am Congé parental och déi Ziler erreechen, déi mir eis gesat hunn. Mir müssen engersäits präiwen, ob de Montant duergeet, an anerersäits, ob een net nach un anere Schrauwe muss dréien, fir datt d'Veereinbarkeet vu Famill a Beruff sech verbessert, besonnesch och am Hibleck op d'Entwécklung vun eiser Gesellschaft. Duerfir ënnerstëtze mir och d'Motioun, datt a spéits-tens dräi Joer d'Regierung soll kucken, wat dës Verbesserung bruecht hunn. An da solle mer dann, wann et néideg ass, deen nächste Schratt maachen.

Allerdéngs si mer iwwerzeegt, datt dës Evalua-tiounen net därfen dozou féieren, datt mer da gesetzlech erëm op de Stand vun haut zréck-falen, mä datt déi Moossname fir méi e grous-sen Équilibre tëschent Fraen a Männer suerge sollen. Dëst huet schonn am Joer 1999, wéi de Congé parental fir d'Éischt gestëmmt gouf, meng gréng Virgängerin Renée Wagener ge-sot. Meng Fraktioun huet dës Projet deemools aus der Oppositoun awer matgestëmmt.

Esou wéi eis Famillje sech veränneren, muss sech och eis Familljepolitik widerentwéckelen. An deem Sënn war dës Reform scho laang iwwerfällg a war sécherlech net fir näischt ee vun den zentrale familljepolitesche Chantiere vun dëser Regierungskoalitioun.

► **Mme Viviane Loschetter** (*déi gréng*).- Très bien!

► **M. Roberto Traversini** (*déi gréng*).- Hei-madder ginn ech den Accord vun der grénger Fraktioun. Ech soen lech Merci. Och der Ma-damm Myriam Schank soen ech Merci, an dem Lynn an dem Mike. Villmools Merci fir d'No-lauschteren.

► **Plusieurs voix**.- Très bien!

► **Mme Viviane Loschetter** (*déi gréng*).- Merci, Merci.

► **M. Mars Di Bartolomeo**, *Président*.- Da brauch ech net méi Merci ze soen. Den Här Kartheiser fir d'ADR.

► **M. Fernand Kartheiser** (*ADR*).- Villmools Merci, Här President. Dir Dammen an Dir Hä-ren, ech wëlt och ufänke mat engem ganz härerleche Merci un den Här Baum, deen eis e komplizéiert Gesetz ganz flott erkläert huet.

► **M. Gilles Baum** (*DP*).- Très bien!

► **M. Fernand Kartheiser** (*ADR*).- Majo ge-sitt Der! Et geet och esou weider, well ech wollt lech soen, datt mer als ADR dëst Gesetz aus-drécklech begrëissen a senger Richtung. Mir sinn och frou, datt de Congé parental refor-méiert gëtt, datt mer méi Flexibilitéit kréien. Mir begrëissen och déi Iddi vun der Indemnité de remplacement oder dem Revenu de rempla-cement, well dat méi Leit erlaabt, de Congé parental ze huelen.

Et si vill positiv Elementer an dësem Gesetz. An ech wäert lech méi spët herno da verroden, wéi mir eis dozou stellen, well mir hunn och gläichzäiteg eng ganz Rei Kriticken.

D'Regierung presentéiert dat heiten als e Schlëssel vun hirer Familljepolitik. Si seet: „Et ass e Meilesteen.“ Mir hunn héieren, et wär eng Moderniséierung. Mä wat awer och muss gesot ginn, dat ass, datt et eng komplett eesäi-teg Familljepolitik ass, eng Politik, déi de Famill-jen de Choix hält.

Den Här Hahn hat sech virdrun a senger Inter-vention driwwer gewonnert, datt eigentlech net vill Leit doheem bleiwe bei de Kanner, an en huet sech gefrot firwat. Ma firwat? Weinst der Politik vun dëser Regierung! Et ass eng eesäiteg Politik. Déi Leit, déi schaffe ginn, déi kréien elo eng besser Konditioun, fir e Congé parental ze huelen - wat mer ausdrécklech och als ADR begrëissen -, mä eise Problem läit do-ranner, datt all déi aner, déi wëlle vläicht do-heem bleiwen, déi net wëllen e Beruff maa-chen, déi sech wëlle Vollzäit ëm hir Kanner këmmern, datt déi déi Méiglechkeet ewech-geholl kréien. Dee Choix, deen hält dës Re-gierung! An dat ass dee Wee, dee mir net mat-ginn.

Mir hunn e puermol als ADR gesot, datt mir en anere Modell géifen huelen: Mir féieren en El-teregeld an. Mir kucken, datt déi Mammen oder déi Pappen, déi wëlle Vollzäit doheem bleiwen, sozialverséichert sinn, datt se eng Pen-siounsversécherung hunn, datt se och am Fall vun enger Scheedung ofgeséichert sinn, datt se en anstännege Revenu hunn, och a Fonctioun vun der Kannerzuel. Dat ass an eisen Aen e Fa-milljemodell, deen déi zwou Säite gläich avan-tagéiert an dee wierklech de Familljen e Choix léisst.

Awer, wéi gesot, dat, wat Dir haut maacht, déi eng Säit bevirdeelegen, dat ass e Wee, dee mir eben hallef kënnen matgoen an Är Richtung a

mir kënnen eben och besser Konditiounen fir de Congé parental ausdrécklech ënnerstëtzen.

Mir müssen eis trotzdeem froen, ob dat Gesetz genau deem entsprécht, wat elo haut an der Entwécklung néideg ass. Eng éischt Fro, déi sech stellt, ass eigentlech den europäesche Kontext. Mir haten héieren an deene verschid-dene Presentatiounen, déi eis gemaach gi sinn, datt den Europäesche Gerichtshaff décidéiert hat, datt eng Prestation familiale ebe muss ex-portabel sinn. An deemools war d'Beuertee-lung opgrond vun deem Facteur entstanen, datt et kee Revenu de remplacement war.

An der Tëschenzäit ass et e Revenu de rempla-cement. An da stellt sech natierlech d'Fro, wéi déi europarechtlech Konsequenzen dovunner sinn. Wann et e Revenu de remplacement ass, wat heescht dat? A mir hunn do eigentlech keng Analys, europarechtlech gesinn. Et wär awer richteg, zemools am Kontext vun deenen aktuellen Diskussiounen, wou esou vill sozial Prestatiounen an hir Exportabilitéit an Europa a Fro gestallt ginn, op de Leescht geholl ginn. An och dat misste mer hei eng Kéier méi genee kucken.

Et ass och hei europarechtlech relevant, well mer jo gewuer gi sinn a verschiddenen Diskus-siounen, datt de Sëtz vun der Firma, wou een affiliéiert ass, wou ee wunnt, datt dat och direkt Konsequenzen huet op déi Prestatioun-en, déi mir hei bezuelen. Also eng Diskus-sioun, déi net onnéideg ass!

Wat eis awer och fundamental stéiert, niewent der Eesäitegkeet vun der Regierungspolitik an der Familljepolitik ganz allgemeng, dat ass déi Amëschung an d'Famill. Mir als ADR, mir ku-cken och ëmmer d'Perspektiv vum Kand. Wat ass am Interessi vum Kand? Ma am Interessi vum Kand ass, datt seng Elteren esou vill wéi méiglech bei em sinn.

A mir soen: Et ass un der Famill, fir ze décidé-ieren, wie soll beim Kand bleiwen, ob dat d'Mamm ass oder ob et de Papp ass. Mir kriti-séiere ganz ausdrécklech déi Fuerderung, déi och hei ëm am Gesetz steet, an dat hu mer ëmmer gemaach, datt dee Congé parental net transférabel soll sinn, datt de Stat virschreift: deen een d'Halschent an deen aneren d'Halschent. An eisen Ae geet dat ze wäit. De Stat huet esou eng Décisioun net ze huelen. Mir respektéieren d'Souveränitéit vun der Fa-mill. Mir loosse der Famill déi Autoritéit, dee Choix selwer ze treffen.

Dowéinst ass dat och e fundamentale Kritik-punkt. Et gëtt e puer Artikelen an deem Gesetz, déi sech direkt oder indirekt op déi Transférabi-litéit referéieren. Mir haten een Abléck envisa-géiert, och nach e Choix séparé doriwwer ze froen. Et gëtt ze komplex, mir loosse dat sinn. Awer ech wëll daitlech aktéieren, datt mir déi Nettransférabilitéit hei kritiséieren. Et ass am In-teressi vum Kand, datt d'Elteren - egal wéi een Elterendeel - kënnen soulaang wéi méiglech bei em sinn.

An d'Regierung seet dat jo u sech selwer! Dir sot an Ärem Gesetz, et wär eng vun de Begrë-nunge vun Ärem Gesetz, datt eng zolidd Relati-on geschafe gëtt tëschent Kanner an Elteren. Ma wann dat de Wonsch ass, wann dat Äert Zil ass, da freet ee sech natierlech, firwat Der et eigentlech heiansdo an der Praxis ausdrécklech verhénnert, datt et kann zu deem Lien kom-men.

Och d'Bedeutung vun de Pappen ass mer net ganz kloer. Mir héieren ëmmer erëm: „Et solle méi Pappen doheem bleiwen“, mä awer den Tenor ass ëmmer: Et solle méi Pappen doheem bleiwen u sech aus Grënn vun der Chancë-gläichheet. Mä ass de Papp net selwer eng wichteg Bezuchspersoun vum Kand, onofhängeg vun der Carrière oder vum Beruff vun der Fra? Ass net och d'Roll vum Papp, d'Virbildfunctioun vum Papp, de Referenzpunkt vum Papp ganz wichteg an der Entwécklung vun engem Kand?

An en huet einfach eng Valeur propre, déi awer an deem Discours, deen d'Regierungskoali-tioun hei féiert, dacks vergiess gëtt zugonschte vun der Carrière vun der Mamm. Dat ass eng legitimen Considération. Et ass awer och eng, déi an eisen Aen net duergeet.

Mir begrëssen awer och an deem Sënn, datt déi Flexibilitéit hei am Gesetz ageféiert ass, déi et gescheetenen oder getrenntene Koppele méi einfach mécht, vum Congé parental ze profitéieren, datt do déi zwee Elterendeeler besser kënnen zu hirem Recht op de Congé pa-rental kommen. Et ass am Interessi vum Kand, datt dat esou geschitt. An duerfir ënnerstëtze mer dat och.

Mir hunn eng Rei vu Considérationen, déi mer och nach müssen hei ausdrécklech ernim-men. Eng ass och scho gesot ginn: Dat ass, datt den Drock vläicht méi grouss gëtt, fir méi e kuerze Congé parental ze huelen, wann een d'Wiel huet zwësche véier Méint a sechs Méint. Et ass an eisen Aen eng wichteg Fro, fir an dräi

Joer, wa mer d'Evaluatioun maachen, ze ku-cken, wéi sech dat dann zäitlech agencéiert an ob wierklech net deen Drock ze vill grouss ass.

Dann ass nach eng aner Saach: Ech mengen och, datt d'Patronen heiansdo net genuch zu hirem Recht komm sinn. Wann een e fraktio-néierte Congé parental hält, et geet ee véier Deeg an der Woch schaffen an dee fënneften Dag net, datt een dann de Kündigungsschutz huet während deene ganzen 20 Méint, déi da beträff sinn, datt schéngt eis och iwwerdrifwen ze sinn. Well wann ee wierklech e Feeler ge-maach huet an et kann een awer weider mat Kündigungsschutz während enger laanger Zäit rechnen, dann ass dat eng Belaaschtung fir d'Betriber. Et kann op jidde Fall eng sinn.

An ech mengen, datt mer musse wuel op d'Rechter vun den Elteren uechtginn, zemools wa se de Congé parental zesummen huele sechs Méint oder véier Méint, datt hinnen do näischt ka geschéien. Mä an deem Fall vun dem fraktionéierte Congé parental misst een awer wierklech nach eng Kéier eng Reflexioun féieren, wéi een e Gläichgewicht ka schafen tëschent de Rechte vun deem, deen de Congé parental hält, an och deene legitimme Surge vun de Patronen, zemools a klunge Betriber, op där anerer Säit.

Dann hu mer nach déi Fro vun de Bankkredit-ter. D'Madamm Minister huet do geschter en présence vu Kamera, Press a mat grousem Tamtam eng Deklaratioun ënnerschrifwen, an där näischt Neies steet. An do muss ee sech awer wierklech froen, ob hei net e bëssen eng Irreführung gemaach gëtt.

Et war ëmmer méiglech fir een, deen e Kredit huet, bei seng Bank ze goen an ze soen: „Hei, ech setzen dee gär aus während enger gewësse-ner Zäit, d'Reckbezielung vum Kredit. Oder kommt, mir kucken, wéi mer dat kënnen besser agencéieren, datt et op menge Revenue besser geet.“ Dat war ëmmer méiglech. An d'ABBL hat dat och schonn e puermol gesot. Et ass awer vun dëser Regierung eng Initiativ ugekë-negt ginn, wou schlussendlech eppes eraus-komm ass, wat e scho gëtt! Dat geet net duer! Wann Der wierklech eppes hätt wëlle fir déi Leit maachen am Bezuch op d'Bankkreditter, dann hätte mer e bësse méi Imagination vun der Regierung erwaart.

Ech wëll och nach vläicht e Wuert soen, well ech nach eng Minutt hunn, iwwert déi Proposi-tiounen, déi d'CSV gemaach huet. Et waren zwou Kategorië vu Propositionen. Dat eent, dat war, fir méi Flexibilitéit eranzekréien. Dat kënnen mir als ADR ënnerstëtzen. Mir hunn déi Amendementer, fir op nach méi Flexibilitéit ze goen, och prinzipiell ënnerstëtzt. Et muss een natierlech kucken am Eenzelfall, wéi een dat da gesetzlech ausformuléiert, mä mat där Iddi, fir och méi laang Periode kënnen Congé parental ze huelen, si mer am Prinzip d'accord, wéi ge-sot, well mer och ëmmer d'Interesse vum Kand op déi éischt Plaz setzen.

Déi aner Iddi vun der CSV, fir de Revenu de remplacement duerch eng Indemnitéit ze er-setzen, dat mécht eis scho méi Suergen; mir fannen et scho gutt, datt de Revenu de rempla-cement agefouert gëtt. Mä d'CSV huet dat ar-gumentéiert mat där Suerg, et soll jiddweree fir d'Erzéiungsleeschtung gläichbehandelt ginn, dass d'Erzéiungsleeschtung vun deem engen a vun deem aneren d'selwecht wäert ass. Mä an hirer eegener Proposition vun der CSV hu mer déi Rechnung net erëmfonnt!

Wann een an der CSV-Proposition véier Méint oder sechs Méint Congé parental à temps plein hält, da verdéngt ee 64 Euro den Dag. Hëlt een en acht Méint, dann huet een nach 48 Euro den Dag. An ech mengen, do war eng Kontra-diktioun an der CSV-Proposition selwer. Wann d'Leeschtung d'selwecht muss sinn, da muss se och gerecht op den Dag awer d'selwecht sinn, soss hält jo keen acht Méint, wann en do pro Dag manner kritt wéi fir véier oder fir sechs Méint. Awer an der Richtung, fir méi Flexibi-litéit eranzekréien, wéi gesot, do kënnen mer op dee Wee matgoen.

Elo hunn ech lech ugekënnegt am Ufank, wou ech lech näamlech gesot hunn, wat mer als Virdeeler gesinn, datt mer prinzipiell ënnerstët-zen, datt de Congé parental besser ausgebaut gëtt, datt mer doranner vill Virdeeler gesinn, datt mer et op där anerer Säit bedauern, datt esou vill Nodeeler awer och an dësem Gesetz sinn: datt mer näischt maache fir déi Leit, déi wëlle ganzdaags doheem bleiwen an iwwer eng laang Zäit wëlle bei hire Kanner Vollzäit doheem bleiwen, datt d'Interesse vun de Patro-nen net genuch gekuckt ginn, datt bei de Bankkreditter net vill geschitt ass, datt vläicht Pressioun op deen Eenzelne kann ausgeübt ginn.

Alles dat considéiert, hu mer décidéiert, dë-sen Text awer matzestëmmen. Mir wäerten de Congé parental weinst senge Virdeeler mat-stëmmen, mä awer bei eiser Positioun bleiwen an och weider derfir kämpfen, datt déi Leit, déi





wëlle Vollzäit doheem bleiwen a sech ëm hir Kanner ganzdaags këmmen, fir se ze er-  
zielen... Fir déi Kämpfe mer virun, mä dëst Ge-  
setz stëmme mer awer och mat.

Ech soen Iech Merci.

► **Plusieurs voix.** - Très bien!

► **M. Mars Di Bartolomeo, Président.** - Merci  
och dem Här Kartheiser. An de leschten age-  
schriwwene Riedner ass den Här Marc Baum fir  
déi Lénk.

► **M. Marc Baum (déi Lénk).** - Merci, Här Pre-  
sident. D'Spreecher vun de Koalitionsparteie  
sinn de Mëtten net midd ginn, d'Virzich vun  
dëser Reform an den héchsten Téin ze luewen  
an ervirzehiewen. An effektiv, mat dësem Ge-  
setzprojet ginn eng Rëtsch Verbesserungen  
un der Ausrichtung vum aktuelle Congé pa-  
rental virgeholl, an dat, fir eis, virun allem an  
zwee Kärberäicher.

Éischtens an ugefaange bei der Indemnitéit  
vum Congé parental, déi kee fixe Montant méi  
soll sinn, mä ab elo eng Aart Zousaz-, Ersatz-  
loun duerstelle soll. Ännelech wéi dat bei anere  
Revenus de remplacement de Fall ass, soll et en  
Ausgläich, wann och plafonéiert, fir d'Enner-  
briechung vun der klasscher Beruffscarrière  
sinn an domadder d'Méiglechkeet schafen, fir  
Beruff a Kannererzéiung méi einfach uneneen  
unzepassen, dëst am Intérêt vu béide Partner  
an enger Koppel.

An et gëtt sech an eisen Ae berechtigterweis  
erhofft, datt dëst e positiven Effekt op d'Be-  
ruffscarrière vu Frae wäert hunn, wéi och e wei-  
deren Ureiz fir Männer schafft, fir sech ver-  
stärkt ëm d'Kand këmmen ze kënnen.

Deen Ersatzloun gëtt elo endlech och erëm un  
den Index gebonnen, respektiv den ieweschte  
Plaffong gëtt un d'Entwécklung vum Mindest-  
loun ugepasst. Klëmmt de Mindestloun, esou  
klëmmt och de Plaffong vum maximale Betrag  
vum Ersatzloun. Domadder gëtt elo endlech  
déi komplett onsozial Desindexéierung vun der  
CSV/LSAP-Regierung vun 2006 erëm réckgän-  
geg gemaach. Mir begrëssen dat ausdréck-  
lech.

Beim zweete Punkt, der Flexibilität, och do  
gëtt et formal Verbesserungen. De Congé pa-  
rental kann elo bis zum Alter vu sechs, an net  
wéi virdru bis fënnef Joer ugefrot ginn. Déi  
zwee Eltere kënnen gläichzäiteg de Congé pa-  
rental huelen. A generell ginn d'Konditiounen,  
fir iwwerhaapt kënnen an de Genoss vun deem  
Congé parental ze kommen, vereinfacht.

Och wann dës positiv Verännerunge sécherlech  
net ze ignoréiere sinn, esou bleiwen dach awer  
an eisen Aen eng ganz Rëtsch kritesch Froen a  
kritesch Bemierkungen ze maachen, grad an  
deenen zwee Beräicher Flexibilität an Ersatz-  
loun. Well ënnert deem Begrëff „Flexibilität“  
kann ee ganz vill verstoen; Guddes a  
Schlechtes. Déi entscheidend Fro ass awer:  
Flexibilität fir wien? An dovunner net ze  
trennen: Wien décidéiert iwwert d'Flexibilität?

Mir wäerten an deenen nächste Wochen hei an  
der Chamber nach méi mat dëse Froen ze dinn  
hunn, besonnesch am Zesummenhang mat  
der Reform vum PAN-Gesetz. Well och do geet  
et ëm Flexibilität. Flexibilität, déi an deem Fall  
vum Salarié ofgefuert gëtt.

Bei dësem Projet hei, esou heescht et, soll et  
ëm d'Flexibilität fir de Salarié goen. Eng Flexi-  
bilitéit, déi et de Leit erméigleche soll, Beruff a  
Kannererzéiung besser mateneen ze verban-  
nen. Also eng Iddi, där ee grondsätzlech nëm-  
men zoustëmme kann.

Wann ee sech elo awer den Text hei ukuckt, da  
stellt ee fest, datt et eigentlech just een neit  
Element vu Flexibiliséierung gëtt, dat e wier-  
lecht Recht vum Salarié duerstellt, nämlech  
datt een de Congé parental plein temps net  
méi muss sechs Méint, mä och elo ka véier  
Méint huelen.

All déi aner Modeller vu Flexibilität, datt  
heescht hallef Deeg oder 20% manner schaffe  
respektiv véiermol ee Mount Congé parental  
huelen, sinn alleguer ëmmer gebonnen un den  
Accord vum Patron. Wann awer déi nei flexibel  
Méiglechkeete vum gudden Wëlle vum Patron  
ofhänken, da stelle se kee wierklecht Recht  
duer.

Iwwer all Wonsch vum Elterendeel op méi flexi-  
bele Congé parental décidéiert a leschter Ins-  
tanz de Patron. Fir Beruff a Famill kënnen ze-  
sammenzebréngen, sinn d'Leit also weider vun  
den ekonomeschen Interessen oder den Desi-  
derata vun de Patronen ofhängeg. Dëst kriti-  
séiert och zu Recht d'Salariatskummer an hirem  
Avis zu dësem Projet a mengt, datt domadder  
déi eigentlech fortschrëttlech Iddi vun der  
Flexibiliséierung vum Elterecongé eigentlech  
schonns vun Ufank un hypothéquéiert gëtt. Si  
menge souguer - Zitatz: «Ce qui va mettre en  
échec la réforme.»

Zougang zu dësen neien, flexibele Modeller,  
déi, wéi gesot, d'Zoustëmmung vum Patron

brauchen, hu just déi Leit, déi een an net méi  
wéi ee Kontrakt hunn, an deenen hire Kontrakt  
méi wéi d'Halschent vun der Regelaarbechts-  
zäit duerstellt. Leit, déi 40 Stonne schaffen,  
awer méi Aarbechtsvertrag hunn, kënnen net  
vun dësen neie Mesurë profitéieren.

An anere Wieder heescht dat, datt weiderhin  
deen eenzege Modell, bei deem et kloer Rech-  
ter op Elterecongé gëtt, deen ass vum Congé  
parental plein temps. Grad do wollt d'Gesetz jo  
awer nei Weeër an nei Méiglechkeeten opmaa-  
che fir d'Elteren. An dëser Ambitioun gëtt den  
Text, an där heiter Fassung, net gerecht.

Weider Neierungen, déi sech och gutt unhéie-  
ren an eng positiv Flexibilität fir de Salarié  
duerstelle kéinten, sinn, éischstens, d'Erofsetze  
vun der Mindeststonnennzuel op zéng Woche-  
stonnen, déi ee brauch, fir kënnen Urecht op  
de Congé parental ze hunn, an zweetens,  
d'Cumuléiere vu méi Aarbechtsvertrag.

Dëst ass effektiv eng nei an an eisen Aen gutt  
Ouverture, déi de sozialen an aarbechtswelt-  
leche Realitéite vu ganz villen, an och beson-  
nesch jonke Leit entsprécht.

De Problem ass awer hei och erëm net nëm-  
men, datt Leit mat méi Aarbechtsvertrag net  
därfen op déi nei, flexibel Formen zréckgräi-  
fen, neen, fir iwwerhaapt kënnen de klassche  
Congé parental à plein temps unzefroen,  
brauche se den Accord vun all hire Patronen.

Huele mer e Beispill: d'Carole. D'Carole schafft  
ugemellt als Haushaltshëllef bei dräi verschi-  
dene Ménagen, soe mer, véier Stonnen d'Woch.

(Brouhaha)

Donieft geet d'Carole nach aacht Stonne bei  
eng kleng Entreprise botzen an hëllef de  
Weekend...

(Brouhaha)

...sechs Stonnen an engem Restaurant als  
Aushëllef.

D'Carole geet also 26 Stonne bei fënnef ver-  
schidde Patrone schaffen. Mat dësem neie Pro-  
jet kann d'Carole elo e Congé parental plein  
temps ufroen. Dat ass nei. An dat ass och gutt  
esou.

Den Hoken derbäi ass awer: D'Carole kritt dee  
just, wann all seng Patronen domadder aver-  
stane sinn! Et geet duer, datt ee vun hinnen,  
also ee vun deene fënnef, dat net wëllt. Dann  
ass et Esseg mam Carole sengem Wonsch, sech  
fir en halleft Joer just ëm säi Kand ze këmme-  
ren.

Dëst Beispill weist, datt de Gesetzestext zwar  
gutt klénkt an och gutt Intentiounen huet, mä  
fir ganz vill Leit riskéiert, un de Realitéite vun  
der Aarbechtswelt ze scheitern. An dobäi ass  
d'Carole geneesou wéi aner Leit, déi méi wéi  
een Aarbechtsvertrag hunn, eent, dat elo  
schon onheemlech flexibel muss sinn, fir  
iwwert d'Ronnen ze kommen.

An dat ass de Paradox vun dësem Projet: Jee  
méi Flexibilität d'Leit duerch hir Aarbechtskon-  
ditiounen müssen un den Dag leeën, desto  
gréisser sinn d'Schwieregkeeten, fir an de Ge-  
noss vun de positiven Elementer vun dësem  
Gesetz ze komme respektiv desto gréisser ass  
d'Ofhängegkeet vum Patron.

Ännelech géllt och fir den Ersatzloun. Och wa  
mer de Prinzip vum Revenu de remplacement  
ausdrécklech begrëssen, sou muss mer awer  
feststellen, datt et virun allem Leit mat  
niddrege Léin an/oder net vollen Täché sinn,  
déi riskéieren, manner ze kréien. Och hei  
rechent d'Salariatskummer vir, datt et fir déi  
Leit mat prekären Aarbechtsverhältnisse sou-  
guer partiell zu Verschlechterunge komme  
kann.

Här President, dëst Gesetz bréngt a wesent-  
lechen Zich Verbesserungen, notament wat  
d'Konzeption vum Ersatzloun ugeet, an och  
weider, wann och beschränkt Flexibilität fir  
béid Elteren. Duerfir wäerte mir dëse Projet och  
ënnerstëtzen.

Mir hätten eis awer gewënscht, d'Regierung  
wier net um hallwee Wee stoe bliwwen an hätt  
e wierklecht an duerchsetzbar Recht fir de Sala-  
rié op méi Flexibilität an dësem Projet veran-  
kert, grad och fir déi Leit, déi prekär Kontrakter  
hunn oder déi am Niddreglounsecteur beschäf-  
tigt sinn, well dat ass den eigentleche Problem  
an eisen Aen, an net, wéi d'Riedner vun der  
ADR oder vun der CSV gesot hunn, datt de Pa-  
tron, d'Rechter vum Patron géifen ageschränkt  
ginn.

Eppes ass fir eis kloer: Eng wierklech besser Ver-  
eenbarkeet vu Beruff a Famill erreeche mer just  
duerch eng substanzuell Reduzéierung vun der  
Regelaarbechtszäit. An duerfir géif et haut  
héich Zäit ginn.

Merci.

► **M. Mars Di Bartolomeo, Président.** - Merci  
och dem Här Baum. An d'Wuert huet elo d'Fa-  
milljeministesche, d'Madamm Corinne Cahen.

**Prise de position du Gouvernement**

► **Mme Corinne Cahen, Ministre de la Fa-  
mille et de l'Intégration.** - Här President, Dir  
Dammen an Dir Hären, loosst mech fir d'Éischt  
och dem Rapporteur villmools Merci soe fir säin  
exzellente mëndlechen a schrëftleche Rapport.  
Och all de Riedner vun haut géif ech nawell  
gäre Merci soen. An ech mengen, dass déi Rie-  
den, déi mer haut héieren hunn, ganz gutt re-  
flétéieren, wéi et an der Chamberskommissioun  
war, nämlech extrem interessant, e ganz flot-  
ten Austausch par rapport zu dësem Gesetzes-  
text. An dofir soen ech och der ganzer Kom-  
missioun villmools Merci, well mir hunn alle-  
guer sécher och nach vill bäigeléiert.

De leschte Weekend hunn ech e Sondage ge-  
lies aus Däitschland, wou gesot ginn ass, dass  
70% vun de Männer an 69% vun de Fraen der  
Meenung sinn, dass d'Kannerkréie fir Fraen en  
„Karrierekiller“ ass. 70%, dat sinn der jo awer  
nawell relativ vill. An dat därer jo awer haut net  
méi de Fall sinn!

Mir hunn et héieren haut: D'Gesetz vum  
Congé parental geet op 1999 zréck, an ech  
kann Iech soen, dass 1999, och nach am Joer  
2000, 2001 an esou weider, d'Fraen och ganz  
schif bekuckt gi sinn an hirer Entreprise, wa se  
gesot hunn, si géifen de Congé parental huel-  
en. Haut ass et esou, dass et zur absolutter  
Normalitéit gehéiert, dass d'Fraen de Congé  
parental huelen, mä dass leider awer ëmmer  
nach d'Männer schif bekuckt ginn, wa se soen,  
si géifen de Congé parental huelen.

Mä mir gesinn awer, dass an deene leschte 17  
Joer e ganz grouse Wee gemaach ginn ass an  
der Mentalitéit vu jiddwerengem, vun all de  
Leit, vun den Entrepreneuren a vun de Salarié-  
en, vun den Aarbechtskolleegen. An ech sinn ex-  
trem zouversichtlech, dass mer dee Wee  
wäerte weidergoen an dass och an Zukunft  
d'Männer net méi wäerte condamnéiert ginn  
oder iergendwéi komesch agestuut ginn, wa si  
décidéieren, de Congé parental ze huelen.

Dofir hu mer och décidéiert, de Congé paren-  
tal ze reforméieren, justement fir dass en  
éischer de Besoine vun deene jonken Elteren  
entsprécht an dass si och méi Zäit mat hire  
Kanner kënnen verléieren... verbréngen!

(Hilarité)

Mir haten...

(Hilarité)

Ech war scho bei mengem nächste Gedanken.

(Interruption)

Ech war scho bei mengem nächste Gedanken.  
Bon, mir wëssen, mir hunn et och haut héie-  
ren, dass 1999 de Congé parental eng aar-  
bechtsfërdernd Measure war. A mir wëssen och  
haut, dass dat iwwerhaapt net gegräff huet. Et  
sollt am Fong esou sinn - an dat war deemools  
de Minister Biltgen, deen dat Gesetz hei an  
d'Chamber bruecht huet -, et sollt esou sinn,  
dass doduerch, dass d'Leit sechs Méint do-  
heem bleiwe mam Congé parental, dann ane-  
rer sollten agestellt ginn, an doduerch sollt de  
Chômage am Fong geholl bekämpft ginn. Dat  
ass awer ni esou gewiescht, well ganz dacks  
sinn déi Leit iwwerhaapt net ersat ginn. A ganz  
dacks eben ass de Chômage ganz sécher do-  
duerch net erofgaangen.

Mir hunn et och héieren: Et goufen ze streng  
Ausgangspositionen. Dat heescht, et huet ee  
mussen op d'mannst 20 Stonne beim  
nämlechte Patron schaffen, fir iwwerhaapt kë-  
nnen de Congé parental ze huelen. Vill Leit  
konnte sech de Congé parental net leeschten,  
ebe weinst deem finanziellen Aspekt. Si haten  
dacks en décke Prêt lafen - oder hunn dacks en  
décke Prêt lafen -, fir hiert Appartement, hiert  
Haus ze bezuelen. An da war dat hinnen och  
dacks vill ze rigid: ebe sechs Méint ganz oder  
zweifel Méint hallef. An et gouf näischt do-  
tëscht. Et gouf näischt, wat e bësse méi uge-  
passt war un dat, wat si gebraucht hunn.

Grad Leit mat engem ganz gudden Schoul-  
ofschloss konnte sech de Congé parental net  
leeschten. An da Leit, déi déi Kritären net erfëllt  
hu vun, wéi gesot, 20 Stonne bei engem Pa-  
tron schaffen - ech ginn do just ee Beispill: eng  
Botzfra, déi dräi verschidde Patronen huet a bei  
jiddwerengem zéng Stonne schafft -, konnte  
bis elo de Congé parental net huelen a wäerten  
en awer vum 1. Dezember dëst Joer un dann  
och kënnen huelen.

Ech sinn immens frou iwwert déi Gespréicher,  
déi mer haten, souwuel am CPTÉ wéi och an  
der Tripartite. Déi hu gewisen, dass jiddwereen  
am Fong geholl wierklech eng Reform vun dë-  
sem Congé parental wollt, souwuel d'Sozial-  
partner alleguer wéi och d'Regierung. An ech  
muss soen, dass wierklech e grousst Versteesde-  
mech war op Säite vum Patronat. Si wëssen  
och haut, dass d'„work-life balance“ extrem  
wichtig ass, fir gutt Mataarbechter ze kréien an  
och gutt Mataarbechter ze halen. A si soen eis  
dat jo och!

Si soe regelméisseg, dass haut de Wonsch vu  
jonke Leit, déi bei si schaffe kommen, e ganz  
aneren ass wéi dee viru 15 oder 20 Joer. Jonk  
Leit froen dacks: Mä wéi ass da meng „work-  
life balance“ hei? A mir wëssen och, dass na-  
tierlech déi „work-life balance“ respektiv dat,  
wat d'Leit brauchen, déi jonk Elteren, absolutt  
variéiert mam Alter vun de Kanner. Si wëlle méi  
Zäit, wann d'Kanner ganz kleng sinn. Si wëllen  
dënschdes, donneschdes mëttes fréi, dacks,  
wann d'Kanner an der Primärschoul sinn. A si  
hunn nach aner Besoinen, wann d'Kanner bis  
méi grouss sinn.

Bon, mat dëser Reform wäerte mer dann zwou  
Saachen aféieren, nämlech de Fait, dass d'Leit  
vill méi flexibel de Congé parental kënnen huel-  
en - si hunn d'Wiel tëschtent ville Congés pa-  
rentaux, dat hu mer och de Mëtteg héieren -,  
an dann natierlech de Revenu de remplace-  
ment, deen d'Indemnitéit wäert remplacéieren.  
A mir wëssen, dass et genau d'Kombinatioun  
vu béidem ass, wat d'Eltere wäert incitéieren,  
méi Zäit bei hire Kanner ze bleiwen.

E klengt Beispill just: Een, deen zum Beispill  
20% Congé parental wäert huelen, dee ver-  
léiert jo net vill. Deen huet 80% Revenu nach  
ëmmer an e kritt seng 20% bis op eng Héicht  
vun 3.200 Euro, wann een dat op 40 Stonnen  
d'Woch héichrechent, nach vum Stat bezuelt.  
An et gëtt, wéi gesot, de Leit d'Méiglechkeet,  
méi Zäit mat hire Kanner ze verbréngen.

An och, wann dacks gesot gëtt, dass déi Flexi-  
bilitéit fir d'Patrone ganz schwierig ass, esou  
erlaben ech mer awer hei als Expatron ze soen,  
dass och do all Entreprise aneschtens funktio-  
néiert. An och do géif ech nawell gäre e Beispill  
haut ginn. Wann ee sechs Méint net do ass,  
dann ass en net do. Entweder kritt een e rem-  
placéiert oder meeschtens kritt een en net rem-  
placéiert, well een net déi richteg Persoun  
fënnt, respektiv bis een déi ugeléiert huet, ass  
deen aneren nees do.

Mä kommt, mir huelen emol einfach d'Beispill  
vun engem Coiffeurssalon. Mir wëssen alle-  
guer, dass d'Coiffeurssalone ganz dacks freides  
a samschdes déi décksten Deeg hunn, dann,  
wann déi meeschte Clienten do sinn. Ech ge-  
sinn, e puer, déi wéineg Hoer hunn, fuere sech  
schon iwwert de Kapp.

(Hilarité)

Mä et ass dach fir e kleng Coiffeurssalon dacks  
méi vu Virdeel, wann e Coiffeur oder eng Coif-  
feuse een Dag d'Woch net do ass, sprécht  
dënschdes oder mëttwochs, an dann awer de  
Weekend, ebe wa vill ze dinn ass, präsent ass,  
wéi wann en einfach sechs Méint oder véier  
Méint guer net do ass.

D'Flexibilitéit, dat wëll ech och eng Kéier hei  
soen, datt ass en Accord, dee mer mat de So-  
zialpartner haten. D'Flexibilitéit, déi ass verhan-  
delt ginn, souwuel mat de Patronen wéi och mat  
de Gewerkschaften.

An d'CSV mengt, et hätt ee misse méi wäit  
goen. Jo, mä dëst ass - mir si voll an engem  
Prozess dran -, dëst ass ee Schratt. Et kann een  
och méi wäit goen. Mä wann een en Accord  
huet mam Patronat a mat de Gewerkschaften,  
dann huet een deen als Regierung och gefäl-  
legst anzehalen! An dofir soen ech souwuel de  
Gewerkschafte wéi och dem Patronat villmools  
Merci, dass mer deen Accord konnte fannen,  
well e wierklech fir d'Kanner ass a fir d'Kand  
am Mëttelpunkt ze hunn, fir dass d'Eltere méi  
Zäit mat hire Kanner kënnen verbréngen.

Mir hunn och héieren: De Congé parental,  
deen zweete Congé parental wäert ee kënnen  
huele bis d'Kand sechs Joer al ass. Dat heescht,  
och dat ass eng substanzuell Ännerung par rap-  
port zu deem, wat et elo gëtt.

Ech géif och gär, Här President, der Zukunfts-  
keess villmools Merci soe fir all déi Aarbecht,  
déi si am Hannergrond am Moment mécht.  
Vläicht e klengen Appell, dass déi jonk Elteren -  
a mir wësse jo, wéi vill Maile mer am Moment  
alleguer kréien - net alleguer mateneen op  
d'Zukunftskeess urufen. Ech kann do de Site  
recommandéieren: www.cae.lu.

An da kann ech och vläicht soen, dass ab dem  
1. November scho virgedréckt Formulairé  
wäerten disponibel si fir déi Leit, déi nach  
wëlte vum neie Congé parental profitéieren an  
awer hir Demande virdru schon erageschéckt  
hunn. Da brauche se dat just auszufüllen a mat  
Accusé de réception eranzeschécken. An natier-  
lech wäert d'Zukunftskeess och nach Informa-  
tionsversammlungen doruechter maachen.  
Dat heescht, jiddweree wäert informéiert ginn.  
Et huet kee Wäert, dass jiddweree gläichzäiteg  
dann dohinner urufft.





Also ech sinn der Meenung, dass dëst e ganz wichtige Meilesteen ass an der Familljepolitik. Et ass eng Familljepolitik fir d'Leit. Et ass eng Familljepolitik fir d'Elteren. An et ass virun allem eng Familljepolitik, déi nom Besoin vun de Kanner kuckt.

A mir fuere virun an deem Prozess, well et sinn nach aner Gesetzer um Instanzewe: Congé extraordinaire, Congé pour raisons familiales, d'Congé d'allaitement. An ech mengen, dass et wichteg ass, dass een d'Sensibiliséierungs-aarbecht weidermécht, dass een d'Patrone sensibiliséiert, dass een och seet: „Okay, Dir musst jo net dee flexibele Congé parental accordéieren.“

Mä ech bleiwen iwwerzeegt dervun, dass dee flexibele Congé parental fir d'Patronen extrem interessant wäert sinn, op d'mannst esou interessant wéi fir hir Salariéen. A mir wëssen alleguer, dass, wann d'Salariéen zefridde sinn, da funktionéiert d'Entreprise natierlech och vill besser. Et ass immens wichteg, dass d'Leit kënnen d'Berufsliewen an d'Privatliewen, d'Familljeliewe matenee kombinéieren.

An ech géif net wëllen ophalen hei, Här President, ouni awer nach ze zielen, dass, wéi ech 2009 Membre élu gouf vun der Chambre de Commerce, do hat an där éischter Plénière deemools d'Chambre de Commerce am Fong geholl un d'Regierung - un déi deemoleg, et ware jo just Wahlen -, un déi deemoleg nei Regierung Recommandatiounen ausgeschafft. An do stoung ënner anerem dran, dass d'Chambre de Commerce der Meenung wär, dass de Congé parental einfach misst op dräi Méint reduzéiert ginn.

An ech hu mer dunnt erlaabt, als ganz neie Membre élu an der Chambre de Commerce, d'Wuert ze froen an deemools schonn ze soen, dass een dat awer vill méi differenziéiert misst kucken an dass een emol vläicht misst no de Besoine souwuel vun de Leit wéi och vun de Betriber kucken an dass een dat vill méi flexibel misst handhaben. Dat war viru siwe Joer!

Ech mengen, d'Chambre de Commerce huet e ganz, ganz wäite Wee gemaach zanterhier. Mir alleguerten! An esou ass dat eben: D'Welt evoluéiert a mir probéieren natierlech, d'Gesetzer un dat unzepassen, wat d'Leit brauchen, wat d'Famillje brauchen a wat d'Kanner brauchen.

Mir spueren net an der Familljepolitik. Mir investéieren an d'Kanner an an d'Familljepolitik. Ech mengen, mir schaffen un der Zukunft vum Land. A wat ass d'Zukunft, wann et net eis Kanner sinn? Ech soen lech Merci.

► **Plusieurs voix.** - Très bien!

► **M. Mars Di Bartolomeo, Président.** - Merci och der Madamm Minister. Domat si mer um Enn vun eisen Diskussiounen a mir kënnen zur Ofstëmmung iwwert de Projet de loi 6935 iwwergoen.

**Vote sur l'ensemble du projet de loi 6935 et dispense du second vote constitutionnel**

D'Ofstëmmung fänkt un. Fir d'Éischt déi perséinlech Stëmmen. Dann d'Procuratiounen. D'Ofstëmmung ass elo ofgeschloss.

De Projet de loi 6935 ass mat 37 Jo-Stëmmen, bei 23 Abstentiounen ugeholl.

Ont voté oui: MM. Marc Angel, Frank Arndt, Alex Bodry, Mmes Taina Bofferding, Tess Burton, M. Yves Cruchten, Mme Claudia Dall'Agnol, MM. Mars Di Bartolomeo, Georges Engel, Franz Fayot, Claude Haagen, Mme Cécile Hemmen et M. Roger Negri;

MM. André Bauler, Gilles Baum, Mme Simone Beissel, M. Eugène Berger, Mme Anne Brasseur, M. Lex Delles, Mme Joëlle Elvinger, MM. Gusty Graas, Max Hahn, Alexander Krieps, Claude Lambert, Edy Mertens et Mme Lydie Polfer;

MM. Claude Adam, Gérard Anzia, Henri Kox, Mmes Josée Lorsché, Viviane Loschetter et M. Roberto Traversini;

MM. Gast Gibéryen, Fernand Kartheiser et Roy Reding;

MM. Marc Baum et David Wagner.

Se sont abstenus: Mmes Diane Adehm, Sylvie Andrich-Duval, Nancy Arendt, MM. Emile Eicher, Félix Eischen, Léon Gloden, Jean-Marie Halsdorf, Mmes Martine Hansen, Françoise Hetto-Gaasch, MM. Aly Kaes, Marc Lies, Mme Martine Mergen, M. Paul-Henri Meyers, Mme Octavie Modert, MM. Laurent Mosar, Marcel Oberweis, Gilles Roth, Marco Schank, Marc Spautz, Serge Wilmes, Claude Wiseler, Michel Wolter et Laurent Zeimet.

Ass d'Chamber bereet, d'Dispens vum zweete verfassungsméissege Vott ze ginn?

(Assentiment)

Merci. Dann ass dat esou décidéiert.

**Motion 1**

A mir si saisiéiert mat enger Motioun, déi, souwäit ech gesinn, vun alle Fraktiounen respektiv Sensibilitäten ënnerschriwwen ass. Ech mengen, d'Motioun ass motivéiert gi vum Rapporteur. Gëtt et nach eng Wuertmeldung zu der Motioun, déi d'Unanimité schéngt ze maachen tëschent de Fraktiounen an de Sensibilitäten?

Da géif ech proposéieren, dass mer géife mat Handophiewen iwwert d'Motioun ofstëmmen.

**Vote sur la motion 1**

Wien domat d'accord ass, ass gebieden, d'Hand ze hiewen.

Géigeprouf: Wien ass dergéint?

Enthalungen?

Also ass déi Motioun, déi de Bilan no dräi Joer fret, unanime ugeholl. Ech soen lech Merci.

### 13. Motion de M. Fernand Kartheiser relative à la langue luxembourgeoise

Da wollt ech der Chamber d'Fro stellen, vu dass mer mat enger Motioun saisiéiert gi sinn am Ufank vun der Sëtzung, wat mer mat där Motioun solle maachen.

Den Här Bodry fret sech d'Wuert dozou. Här Bodry, Dir hutt d'Wuert.

► **M. Alex Bodry (LSAP).** - Jo, Här President, Dir Dammen an Dir Hären, mech stéiert manner de Contenu vun der Motioun, och wann ech net mat allem averstane sinn, wat drasteet, wéi den Zäitpunkt vun där heiter Motioun.

Momentan gëtt et eng Petitioun, déi leeft nach ëmmer. D'Petitioun 698, déi genau dat doten zum Sujet huet, déi leeft momentan nach ëmmer, kann nach ënnerstëtzt gi bis de 24. Oktober. Duerno - iwwer 14.000 Leit, déi déi Petitioun ënnerstëtzen! - wäerte se hei gehéiert gi vun der Chamber.

Ech géif et aus Respekt virun deene Leit, déi déi Petitioun lancéiert hunn, a virun allem virun deene ville Leit, déi déi Petitioun ënnerstëtzen, net gutt fannen, dass mer elo géifen, éier mer déi Leit ugehéiert hunn, éier mer eis Prozedure vun der Petitioun hei duerchgezunn hunn, hei eng Ofstëmmung maachen an der Chamber iwwer Konklusiounen, déi am direkten Zesummenhang si mat deem Sujet, dee vun der Petitioun hei opgeworf ginn ass.

Well, Här Kartheiser, Dir wësst och, déi heite Positioun hätt Der gradesou gutt kënnen virun zwee Joer hei an der Chamber erabrëngen, wéi Der selwer eng Interpellatioun zu deem selwechten Thema hat. Dat hutt Der net gemaach. Dir maacht et elo am Zesummenhang mat der Petitioun.

Duerfir géif ech hei proposéieren, dass mer aus Respekt virun der Prozedur vun der Petitioun net an dësen Deeg hei géifen driwwer ofstëmmen, mä dass mer dat géife reportéieren op en Datum, eng ëffentlech Sëtzung nodeem mer all déi Leit héieren hunn, déi déi Petitioun eragereecht hunn. Ech mengen, déi Leit verdéngen deen dote Respekt.

► **Plusieurs voix.** - Très bien!

► **M. Mars Di Bartolomeo, Président.** - Merci fir déi Proposition. Dozou Stellungnamen? Den Här Wiseler.

► **M. Claude Wiseler (CSV).** - Merci, Här President. Ech mengen, datt den Här Bodry hei eng ganz rasonabel Proposition gemaach huet, déi eigentlech eis Ennerstëtzung fënn. Ech fannen, datt mer déi Diskussioun...

► **Une voix.** - Mir versti guer näisch.

► **M. Claude Wiseler (CSV).** - Da waart, elo héiert Der.

(Hilarité)

► **Plusieurs voix.** - Jo.

► **M. Claude Wiseler (CSV).** - Ech fannen, datt den Här Bodry eng...

(Interruption)

Ech fannen, datt den Här Bodry eng ganz rasonabel Proposition hei gemaach huet. Déi Diskussioun kréie mer souwisou, mengen ech, hei an der Chamber am Kader vun där Diskussioun, déi mer mussen, éischstens, mat de Pétitionnaire féieren. An duerno schéngt et mir absollut evident ze sinn, datt mer och hei an der Chamber selwer eng Diskussioun iwwert déi Thematik do wäerte féieren, soudatt ech déi Proposition do nëmme kann ënnerstëtzen.

► **M. Mars Di Bartolomeo, Président.** - Merci. Den Här Berger.

► **M. Eugène Berger (DP).** - Merci, Här President. Zum Inhalt wëll ech mech de Moment net äusseren. Mä effektiv ass eigentlech de Punkt deen, datt et de Moment net dee rich-

tege Moment ass, fir doriwwer ze diskutéieren an ofzestëmmen, well mer eben, et ass scho gesot ginn, fir d'Éischt sollen déi Leit unhéieren, déi déi Petitioun lancéiert hunn. Duerno kënnen mer dat dann natierlech hei an der Chamber maachen. Duerfir ënnerstëtze mir och déi Proposition, déi gemaach ginn ass.

► **M. Mars Di Bartolomeo, Président.** - Merci och dem Här Berger. Dann d'Madamm Loschetter. Zu Wuert gemellt huet sech och den Här Kartheiser.

Madamm Loschetter.

► **Mme Viviane Loschetter (déi gréng).** - Här President, et ass alles gesot.

► **M. Mars Di Bartolomeo, Président.** - Merci, Madamm Loschetter. Ech géif vläicht de Krees zoumaachen an dann d'Wuert dem Auteur ginn. Den Här Wagner kritt et nach virdrun.

► **M. David Wagner (déi Lénk).** - Merci. Jo, mir géifen eis och der Proposition vum Här Bodry ralliieren. Ech mengen, et muss ee fir d'Éischt emol och d'Diskussioun féieren am Hearing, deen dës Petitioun déclenchéiert huet. Dat soen ech ëmsou méi, well ech och nach Member vun der Petitiounskommissioun sinn. Ech mengen, dat wär och eng Fro vu Respekt géigeniwwer vum Pétitionnaire. An da kënnen mer dat a Rou weiderhin diskutéieren.

► **M. Mars Di Bartolomeo, Président.** - Merci dem Här Wagner. Den Här Kartheiser, deen eis seet, wat e vun de Virschléi hält.

► **M. Fernand Kartheiser (ADR), auteur.** - Villmools Merci, Här President. Jo, mir hunn an de leschten Deeg ganz vill iwwert d'Lëtzebuerger Sprooch héieren an ech mengen, et war vun eiser Säit aus ni interpretéiert ginn, datt all déi Leit, déi sech elo zu der Wichtigeet vun der Lëtzebuerger Sprooch äusseren, domadder net genuch Respekt géintiwwer de Pétitionnaire gewisen hätten.

Et ass an eisen Aen ëmmer eng gutt Geleeënheet an ëmmer e gudden Zäitpunkt, wann ee sech fir d'Lëtzebuerger Sprooch asetzt. A mir kënnen awer och gär nach déi Zäit waarden, bis mer déi Unhéierung hei an der Chamber haben.

Ech géif just proposéieren, Här President, wann ech d'Interventioun vu menge Kolleegen hei richteg interpretéieren, datt se sech net géifen opposéieren, géife mer hei proposéieren, datt Der vläicht déi Motioun dann op den Ordre du jour vun der éischter ëffentlecher Sëtzung setzt, nodeem déi Unhéierung geschitt ass. Ech mengen, dann hu mer jo dat respektéiert, wat hei proposéiert ginn ass a mir hätten deen Abléck och déi Garantie, datt mer déi kleng zäitlech Verlagerung net allze wäit no hannen drécken.

Wa mer eis kéinten dorop eenegen, mengen ech, wiere mer ganz frou an dankbar. Merci.

► **M. Gast Gibéryen (ADR).** - Dat dierft kee Problem sinn!

► **M. Mars Di Bartolomeo, Président.** - Ech mengen, all d'Membere vun der Presidentekonferenz hunn dee Wonsch matkritt a si wäerten zum gegebenen Zäitpunkt, wa mer den Ordre du jour fixéieren, dorop zrëckkommen.

(Interruption par M. Fernand Kartheiser)

Jo, Dir hutt jo och en Observateur an der Presidentekonferenz, dee sech dann zum Echo vun Ärem Wonsch wäert maachen. Dat gesot, géif ech mengen, dass hei jo dann Unanimitéit ass, fir dat esou ze maachen. Ass dat esou?

(Assentiment)

Merci. Da maache mer dat esou.

Da géife mer zum nächste Punkt vun eiseem Ordre du jour iwwergoen. Dat ass de Projet de loi 7059, deen de Paräisser Accord iwwert de Klimaschutz soll hei bei eis ëmsetzen. D'Riedezäit ass nom Modell 1 festgeluecht an d'Wuert huet direkt de Rapporteur, den honorabelen Här Henri Kox.

### 14. 7059 - Projet de loi portant approbation de l'Accord de Paris sur le changement climatique, adopté à Paris, le 12 décembre 2015

**Rapport de la Commission de l'Environnement**

► **M. Henri Kox (déi gréng), rapporteur.** - Merci, Här President, fir d'Wuert. Wéi virdrun d'Familljeministesch beim Gesetz iwwert de Congé parental gesot huet, dass et e Meilesteewär fir d'Lëtzebuerger Familljepolitik, esou kann ee sécherlech behapten, dass dëst Gesetz, wat mer hei elo um Ordre du jour hunn, e Meilesteewär praktesch fir d'Weltgemeinschaft wäert sinn. Et ass e wichtegen a richtige Schratt fir eis Kanner, awer och fir eis Kandskanner. Et kéint ee souguer den Neil Armstrong

zitieren, wéi e gesot huet, e klenge Schratt hei fir eist Land, wa mer dëst votéieren, mä e ganz grouse Schratt fir d'Mënschheet!

(Mme Simone Beissel prend la présidence.)

Dëse Projet de loi huet als Finalitéit, wéi virdrun vum President gesot, den Accord vu Paräis ze ratifizéieren, deen den 12. Dezember 2015 op der COP21 ugeholl gouf. Wat ass d'COP21? Dat ass d'Convention-cadre des Nations Unies sur les changements climatiques vun der Weltgemeinschaft, déi sech mat der Klimaproblematik beschäftegt, déi mer haut eben, wéi gesot, solle ratifizéieren.

D'Konventioun selwer gouf vu Lëtzebuerg den 22. Abrëll 2016 schonn ënnerschriwwen, an dëst um Jour de la Terre, an dëst net eleng vun nëmme Lëtzebuerg, mä vun 175 Parteien, dat heescht vun 174 Länner an der Europäescher Commissioun, déi als eng Partei duergestallt gëtt.

Dësen Accord, dee fir mech e weltëmfassende Vertrag ass, wou praktesch all d'Länner am Boot sinn, ass e ganz wichtige Accord. An ech wëilt do gären de Laurent Fabius zitieren, dee vun engem „accord universel“ iwwert de Klima geschwat huet. En huet eng Rei Adjektiver genannt, fir dësen Accord ze beschreiwen, an e seet: „Dësen Accord ass differenziéiert, dësen Accord ass gerecht, dësen Accord ass nohalteg, dësen Accord ass dynamesch, dësen Accord ass équilibréiert an dësen Accord ass juristesches bindend fir eis Länner alleguerten.“

Wéi eng Ziler huet dësen Accord ze erfüllen a wéini trëtt dësen Accord a Kraaft? Ziler ginn et der dräi. Dat Wichtige ass dat, fir de Weltklima op eng Temperatur vu maximal 2 Grad Erhéijung ze begrenzen, voire op 1,5 Grad hinzeistere. Dëst geet nëmme, wa mer alleguerten zesummen an engem Boot sinn. Dofir ass all Land opgefuerdert, eng Rei vu Moosnamen ze maachen, an all Land ass gefuerdert, eng Rei vu Reduktiounsmoosnamen a senger Politik ze definéieren.

An dat Drëtt, vläicht och eent vun de wichtegsten Ziler, dat ass de finanziellen Engagement: de finanziellen Engagement insbesondere vun den héichentwéckelte Länner vis-à-vis vun den Drëttweltlänner, déi sech drop accordéiert hunn, fir bis 2020 100 Milliarden Euro ze sammeln..., 100 Milliarden Dollar ze sammeln. Ee Moment wann ech gelift. 100 Milliarden Dollar bis 2020 ze sammeln!

A fir Lëtzebuerg bedeit dat, dass mir eisen Accord schonn op 35 Milliounen ginn hu bis 2020, fir de finanziellen Ausgläich tëschent den ënnerentwéckelte Länner an den héichentwéckelte Länner ze maachen.

E klengen Historique vläicht iwwert déi ganz Accorden, well da gëtt ee sech der Bedeitung méi bewosst iwwert déi Schnellegkeet, déi mer awer hei fäerdegbuecht hunn, fir den Accord vu Paräis elo ze ratifizéieren.

Déi éischt Konferenz war scho laang, viru 24 Joer, dat war den 13. Juni 1992 zu Rio de Janeiro, wou déi éischte Kéier iwwert d'Begrenzung vun der Temperatur, vun dem Ausmooss vun der Klimaverännerung diskutéiert gouf. Et huet gedauert bis 1997, wou de Kyoto-Accord definéiert gouf. Dat war déi drëtt Reunioun vun der COP. Dofir gouf déi deemools COP3 genannt.

Den Accord vu Kyoto huet awer nach bis 2005 gebraucht, fir a Kraaft ze treden, an en huet sech an zwee Deeler opgespléckt. Dat ass eng Kéier eng éischt Period, déi ass gaange vun 2008 bis 2012, an déi zweet Period, déi ass de Moment amgaangen ëmgesat ze ginn an déi geet vun 2013 bis 2020. Am Ennerscheid awer zu Paräis hu beim Kyoto-Accord nëmme... oder d'Emissiounen, déi e berücksichtegt huet, stellen awer nëmme 15% duer. 85% vun den Emissiounen vun deene Länner, déi ganz héich Emissiounen maachen, sinn näamlech net beim Kyoto-Accord derbäi gewiescht!

Wou sti mer elo bei der Ratifikatioun? Do kënnen mer soen, dass mer et gepackt hunn! Gepackt, well d'Europäesch Commissioun, oder d'europäesch Ëmweltministeren de Freideg virun engem Woch driwwer diskutéiert hunn, dass se den Accord wëlle ratifizéieren. D'Europäesch Parlament huet et genau virun engem Woch gemaach. An dat war de Startschuss, fir kënnen dësen Accord ëmzesetzen. Well den Accord huet zwou Bedéngungen: Et mussen 55 Länner vun der Welt den Accord ratifizéiert hunn a 55% vun all den Emissiounen mussen vun deene 55 Länner gedeckt sinn.

Doduerch, dass d'Europäesch Parlament d'lescht Woch ënnerschriwwen huet an och ratifizéiert huet, sinn haut - oder op dem Stand vum 6. Oktober - 74 Länner, déi dësen Accord ratifizéiert hunn a si ëmfaassen am Ganzen 58,8% vu sämtlechen Emissiounen, déi ausgestouss sinn. Domadder kann dësen Accord a Kraaft treden, näamlech 30 Deeg duerno, an dat ass laut der UNO de 4. November, wou dë-